

NAGASULAY SA PAGBUHAT UG BULOHATON SA DIOS NGA WALA SA KABUBUT-ON SA DIOS



Magpabilin kita sa pagtindog karon sa makadiyut samtang adunay atong pag-ampo. Atong iduko ang atong mga ulo.

Ginoo, malipayon kami niining buntaga nga mahibalik sa balay sa Dios, sa usa pa ka bulohaton. Ug kami nagaampo, Dios, nga itarung Mo kami niining buntaga sa tanan namong mga kasaypanan. Ipakita kanamo ang maong agianan nga Imo nang gikatagana nga among angay lakwan. Ug ihatag kanamo ang Imong grasya ug gugma, aron nga among masunod kadtong mga agianan ug mga pahimatngon uban sa tibuok namong mga kasingkasing, aron hinaut nga kami makaplagan, nianang adlaw, diha kang Cristo, nga walay ikasaway, tungod kay kami nagatoo, Ginoo, nga ang Iyang pagtungha haduol na.

² Amo nang makita ang tanang mga ilhanan nga Iyang giingon nga magakahitabo sa dili pa gayud ang Iyang Pag-abot, nga karon nagakatuman na. Ug uban sa kalipay kami nagapaabot alang nianang higayona. Sama kang Abraham kanhi nga nagpaabot alang sa maong gisaad nga anak nga lalaki, ug nga nakita kadtong katapusang mga ilhanan sa Dios nga nagapanaug sa yuta, dayon iyang nasayran nga dili na magdugay hangtud nga ang maong anak nga lalaki moabut na. Ug karon amo kining makita nga magakahitabo na pag-usab. Si Jesus nag-ingon kanamo nga, “Inigsugod nga magakahitabo na kining mga butanga,” ihangad na ang among mga ulo, nga ang among—among kaluwasan nagakahiduol na, “panagkalibug sa panahon, kagul-anan tali sa kanasuran, mga linog sa nagkalainlaing mga dapit, ang mga nagadaguok nga dagat, ang mga tawo nga ginapanguyapan tungod sa kalisang.”

³ Among naila nga ania na kami nianang taknaa, sa dihang ang kanasuran wala na masayod kung unsa na ang buhaton. Aduna pay laing gubat nga nagasingabot, nga morag. Unsa ka makalilisang nga butang nga mahitabo! Ang kalibutan nga nagakabungkag na, mga syentistang nagaingon nga usa ka butang nga makalilisang ang nagakahiduol na. Among makita ang Biblia nga nagaingon niini. Kon ingon-niini, Ginoo, tabangi kami karon sa pagbarug niining balay’ng badlunganan, ug modawat sa mga mando gikan sa among Dios, sa pagpadayon niining panahon sa kangitngit, aron sa pagpadan-ag sa Kahayag,

tungod kay tingali'g kini na ang among katapusang higayon sa pagbuhat sa ingon. Tungod kay among ginapangayo kini sa Ngalan ni Jesus ug alang Kaniya. Amen.

Makalingkod na.

⁴ Sa tinud-anay akong giisip kini nga usa ka dakung prebilibhiyo, nga maania dinhi sa tabernakulo niining buntaga. Ug ginakasubo ko nga wala nay igong lugar kalingkuran, sa palibot, alang kaninyo. Ug ang lugar puno na, ug nanindog na sa gawas bisa'g asa.

Kamong mga tawo sa gawas karon, madungog man ninyo kini sa inyong radyo. Akong nahikalimtan. . . [Adunay usa nga nagaingon, “Kalim-a'g lima ngadto sa kalim-a'g pito.”—Ed.] Kalim-a'g lima ngadto sa kalim-a'g pito. Kamong mga tawo sa gawas, ug dinha sa mga paradahan, ug dinha sa mga kalye, madungog kini sa inyong mga radyo, mga tunga-tunga sa kalim-a'g lima ug kalim-a'g pito diha sa dayalan sa inyong mga radyo. Busa among gisuwayan. . .

⁵ Mibalik ako, diay, paanhi, aron paninguhaan nga magkaadunay usa ka mga napulo ka adlaw'ng tigum, aron hisgotan diha ang hilisgotan sa *Ang Pito Ka Katapusang Mga Panaksan*. Tungod kay, sa tunga-tunga niadtong mga Panaksan mao ang Mga Trumpeta. Ug ako kamong ginasultihan kaniadto diha sa. . . sa dihang igawali ko na ang mahitungod sa Pito ka mga Trumpeta, nga ako silang iapil uban sa Mga Panaksan ug sa Mga Hampak. Ug nahunahunaan kong mamahimo kini nga usa ka maayong kahigayonan. Mao pay akong pagbalik gikan sa Africa, ug—ug ang mga bata wala pay ilang bakasyon.

Ang akong gamay'ng bata, si Joseph, aduna—duna nay morag gamay'ng. . . nagkinahanglan ug pipila ka mga semana sa pagtuon sa iyang pagbasa. Nakapasar siya, maayo man, apan wala pa niya maabot ang gikinahanglan. Busa amo siyang gipabilin sa Tucson, mao nga, samtang didto ako sa Africa, ug siya nagpadayon sa pagbasa ug nag-apas niini, pinaagi sa pipila ka pang-adlaw nga klase.

Ug dayon mibalik kami. Ug nahunahunaan ko, nga samtang ang mga bata anaa sa ilang mga bakasyon, magkaaduna ako'y diyutay nga panagtigum dinhi uban sa katawhan, ug iwali kining nga hilisgotan. Apan sa among pag-abot dinhi, among nasayran nga dili nato magamit ang maong awditoryum sa tulunghaan.

⁶ Ug nasayod ako nga ang tabernakulo dili arang igo aron sa pagpalingkod sa katawhan, ug himoon silang komportable sa ilang kahintang nga ingon niana unta sa dihang sila. . . sa dihang ginadala ko kining Mensahe, busa kinahanglan nato ang—ang pagbuhat ug laing pagpangandam. Ug imbis nga sa—sa napulo ka gabii nga atong ginaplanong buhaton, bueno, ako na lang gihimo kini'g duha ka mga bulohaton matag Dominggo;

niining Dominggo, sa sunod Dominggo, ug sa sunod pang Dominggo, duha ka mga bulohaton. Busa, ug wala pa gayud nato kini napahibalo.

Ug, unya, kung aduna may nakabati sa unsa mang paagi nga ang maong mga panagtigum magasugod sa petsa baynte-otso, didto sa maong awditoryum sa tulunggaan, kung gitugot sa Dios, bueno, kung aduna man kamo'y mga higala ug nga nakakuha na ug mga reserbasyon sa mga motel, ako—akong—bakwion kini, kita n'yo, tungod kay—nga sila, dili nato makuha ang higayon nga magkaaduna niini. Dili nila makuha ang—ang maong awditoryum sa tulunggaan.

⁷ Ug karon buot ko maghisgot, bahin lamang sa pang-ebanghelyo nga mga bulohaton sa Dominggo sa buntag. Ug sa Dominggo sa gabii buot kong adunay pagpangampo alang sa masakiton. Ug kita nagasalig nga ang Dios makigtambo kaninyong mga katawhan nga masakiton. Wala ako masayod kung unsaon ni Billy ang pag-atiman kaninyo; sa pagtoo ko, diha sa paghatag ug mga kard alang sa pagpaampo, o sa unsa pa man, sa mga pamaagi sa pagpahan-ay sa kongregasyon. Apan among buhaton ang kutob sa among mahimo aron maampoan ang matag tawo sa sulod niining mosunod nga tulo ka semana nga atong ginaplanong magkaadunay bulohaton, kung kini maoy kabubut-on sa Ginoo.

⁸ Ug dayon sa makadaghang mga higayon magkaadunay kinaugalingong mga pakighinabi, adunay tawong gusto lang makigkita kanimo sa makadiyut bahin sa usa ka butang o butang nga ingon niana. Ug atong . . . Pila man ang ania dinhi nga gusto'g kinaugalingong pakighinabi, atong tan-awon ang inyong kamot. Waw! Kinsa may dili? Busa kon ingon-ana atong . . .

⁹ Morag mahimong malisud ang pagbaton sa mga niini, busa isulat ang inyong hangyo ug ipadala kini, itunol kini kang Billy, unya dayon mahimo kong kuhaon kana didto. Ug, karon, iyang ipahibalo ang mahitungod, siguro, sa mga kard sa pagpaampo, sa diha man nga ipanghatag na kini.

¹⁰ Pila man sa atong mga kaigsoonang nagapang-alagad ang ania dinha niining buntaga? Wala pa kita nakahigayon sa, wala ko nagapanaghap . . . Nailhan ba ninyo ang si bisan kinsa man kanila? Pila man ka mga ministro ang ania dinhi niining buntaga, mahimo bang itaas lang ninyo ang inyong mga kamot? O, motindog. Atong tan-awon kung pila man ka mga ministro ang ania sa kongregasyon niining buntaga. Bueno, maayo! Salamat sa Ginoo tungod niining mga tawhana. Hinaut unta aduna kita'y panahon sa pag-ila-ila sa matag usa kanila, apan nakasiguro ako nga nakita ninyo sila. Ug kami . . . Ang Dios maoy nasayod kanila sa ilang pagpamuhat, ug nagaampo kita nga ang Dios magapanalangin kanila sa madagayaon. Ug, sa walay duhaduha, daghan kanila nga giusog ang ilang bulohaton, aron

makaanhi. Si Igsoong Junior Jackson ug, nagtoo ko, si Igsoong Don Ruddell, ug didto kining maong sibya nagaabut ngadto sa ilang mga kasimbahanan. Ug dayon, usab, ngadto sa New York ug sa laing mga dapit latas sa nasud, pinaagi kini sa pribadong telepono ngadto sa matag simbahan niining buntaga.

¹¹ Akong gikalipay nga makita si Igsoong Richard Blair nga nagalingkod dinhi. Bag-o ko pa nabasa ang usa ka sulat mahitungod sa usa ka dakung butang nga gibuhat sa Dios taliwala sa mga tawo didto. Sa miaging adlaw, sumala sa akong nasabtan. . . Mahimong masayup ako, Igsoong Blair; kon sayup man ako, koreksiyoni ako. Nagabuhat siya kaniadto, ginatabangan ang usa ka tawong nagataud ug kuryente sa usa ka dakung-sakyanan o ingon niana, maoy sa akong pagtoo. Akong gibasa ang sulat. Ug adunay butang nga ilang nasuli, ug, naunsa man nga, mipadagan kini ug kuryente ngadto sa tubig diin didto ang usa ka gamay'ng batang lalaki, sa usa. . . ang—ang maong tawo kinsa tag-iya sa dakung sakyanan, ang iyang gamay'ng batang lalaki, gamay pa gyud nga bata, ug mipatay kini sa maong gamay'ng bata. Ug miburol ang iyang tiyan. Nasayod na kita sa makuryentihan, ingon niana, kung mamatay sila, mao kana'y nagakahitabo. Ang mga mata mibudlat; ang iyang mga ngipon miongut.

¹² Nakapahikurat kini pag-ayo sa mga kaigsoonan. Nag-ingon si Igsoong Blair nga nahunahunaan niya nga kon mahimong makontak ako kon diin man, aron maampoan kini, apan nakahinumdom nga kini mao'y, “Diin gani ang duha o tulo nga magkahiusa sa Akong Ngalan, anaa Ako sa ilang taliwala.” Ug ang maong amahan nangapanit ang iyang mga kuyamoy sa iyang paningkamot nga mahisulod ang iyang mga kuyamoy sa gamay'ng baba sa maong bata, aron maabli kini. Ug miluhod sila ug misugod sa pag-ampo diha sa maong gamay'ng bata, ug nabuhi siya pag-usab.

¹³ Tinuod ba kana, Igsoong Blair? Usa sa atong matinud-anong mga Igsoon dinhi. Oh, ang maong gamay'ng bata ania dinhi. Bueno, salamat sa Ginoo. Maayo kaayo kana. Gusto namong motindog ka, dodong. Karon, atong ginapasalamatan ang mahal nga Ginoo tungod niini. Kana ba ang amahan sa gamay'ng bata? Ikaw ba ang amahan? Husto. Ug ania si Igsoong Richard Blair. Ang atong Dios makahimo sa pagbuhat ug bisan unsang butang. Oo, sir. Iya kining gisaad. Ania kita nagakinabuhi sa Langitnong Presensiya sa gamhanang, mahimayaong, Langitnong Amahan. Ug ang tanang butang nga atong. . . mamahimo kung makatoo lamang kita niini.

¹⁴ Inyong makita kon unsa may ginabuhat niana, kon unsa may gibalus niini alang sa kinabuhi nianang maong tawo sa pagtoo niana? Giluwas ang iyang gamay'ng bata. Karon, ang Dios adunay iyang matinud-anong mga alagad didto, aron sa. . . Si Igsoong Blair ug sila, sa pag-ampo alang sa maong gamay'ng

bata sa dihang atua pa siya niadtong kahimtanga. Oo, sa dihang nagakahitabo ang bisan unsang butang, hinumdumi, kamo'y mga anak sa buhing Dios.

“Kon diin man nga adunay duha o labaw pa nga nagkatigum sa Akong Ngalan, anaa Ako.” Ug usab nahisulat kini, “Siya ang madali nga katabang sa panahon sa kalisdanan.” Ug kung aduna may kalisdanan niadto, mao kadtong gamay'ng bata nga nagbuy-od didto, patay na, diha sa yuta, gikan sa pagkakuryente sa elektrisidad nga milatay kaniya. Busa atong ginapasalamatan ang Dios niining buntaga, sa tibuok natong mga kasingkasing, alang niini, alang niining mga butang nga Iyang nabuhat alang kanato.

¹⁵ Ang Dios magapanalangin niining mga matinoohong kalalaken-an, usab. Sa panahon sa kalisdanan kana maoy panahon sa pagdangup ngadto sa Dios. Ug pagdangup Kaniya, ug pagpakighigala Kaniya sa dili pa nagaabot ang mga kalisdanan. Nahibalo kita niini. Kung nahamuot ang Dios kanato, makapangayo kita Kaniya ug bisan unsang butang, sama sa imong himoon sa uban pa nimong higala, ug Siya madali kaayo nga katabang sa panahon sa kalisdanan.

¹⁶ Bag-ohay ko pa nahibalag sa karsada, kagahapon, ang igsoong babaye ni Igsoong John Martin. Ako... Adunay mipahunong kanako diha sa dalan, ug dihay milabay ug miwara-wara sa ilang kamot. Sa pagpauli na, nasayod na mo, imong makita ang mga tawo sa matag dapit, nagahunong ug nagapakiglamano, ug uban pa. Ug kining maong babaye, akong mahinumduman nga ila akong gitawgan sa dili pa dugay, diin adunay nagbangga kaniya sa likud, sa usa ka sakyanan, nagbali sa iyang dugukan ug tanan na sa ibabaw ug ubos. Mamahimo siyang paralisado sa tibuok niyang kinabuhi. Ania siya niining buntag sa tigum nagalingkod, nagamaya sa Presensiya sa Dios. Bag-ohay pa gyud ako nakigsulti kaniya didto sa maong lawak. Buot kong mag-ampo uban kaniya, pag-usab. Ug siya'y... Ania siya dinhi kon asa man. Siguro dili na siya makasulod pagbalik.

Apan, dinhi, sigurado, ania siya nagalingkod karon mismo uban kanato. Husto kana. Mahimo bang motindog ka sa makadiyut lamang, igsoon, aron ang katawhan mahimong... Ania ang maong babaye nga ang doktor nag-ingon na, sa milabay'ng pipila ka mga adlaw, nga dili na gayud makalakaw, usa ka nadaut na nga dugukan ug tanan na, gumikan sa pagkabangga—pagkabangga. Ug anaa siya dinha nagatindog, maayo na.

Nahibalo mo, ang Biblia nag-ingon, “Ug wala sila'y masulti batok niini, tungod kay ang maong tawo nagatindog na man sa ilang taliwala.” Husto kana. Ania ang gamay nga batang lalaki gibanhaw gikan sa kamatayon, ug ania ang babaye nga adunay

nabali nga dugukan, nagatindog sa atong taliwala. Bag-o pa lang kini nabuhat, busa Siya mao sa gihapon kagahapon, karon, ug hangtud sa kahangturan. Dalaygon ang Ngalan sa Ginoo! Daw sa unsa kita kaangay nga malipayon nga nagapuyo karon diha sa Iyang Presensiya, ug nasayod nga Siya kining madali kaayo nga katabang sa panahon sa kalisdanan.

Nalipay ako nga makita si Igsoong Vayle, si Igsoong Martin, daghan pa kaayo ang ania ning buntaga. Ang Ginoo magapanalangin kaninyo mga igsoon, sa madagayaon. Karon kini mao'y . . .

¹⁷ Nasayod ko nga dili kaayo mabugnaw dinhi, uban niining katawhan, apan bisan pa niana, sa akong paggikan sa Tucson sa miaging adlaw, mga usa na ka gatus kadto ang temperatura ug upat o lima. Ug sa hapit na ang tungang gabii, kadto mga kasiyam na ug tulo, ug busa ingon ug maayo na kini kanako. Ug didto sa Parker giingon nila nga kini usa na ka gatus ug kap-atan, sa Biyernes sa wala pa kami migikan. Ug mapamalandongan ninyo kung unsa kadto ka init. Siyempre, sa kamad-an man kadto.

¹⁸ Ug, karon, niining mosunod nga tulo ka Dominggo. Karong adlaw, petsa kinse, nagtoo ko, husto ba kana, o petsa dyesesays; petsa kinse, dili ba? Dyesiotso, ug sa baynte-otso, ug sa uno sa Agosto, (husto ba kana?) Sa Agosto. Sa petsa baynte-singko . . . Sa petsa dyesiotso, sa baynte-singko, ug sa uno, adunay pagahimoong bulohaton sa tabernakulo. Ayaw'g, pugusa kini, nahibalo na mo, tungod kay, nakita ninyo, dili nato makuha kon unsay gusto nato sa sulod, kon unsay ania karon dinhi, sa sulod, nahibalo na mo, ug nagasamut pa kini. Balik lang kung mahimo ninyo.

¹⁹ Ug unya ania ako aron sa pagtipon sa mga tinugyanan. Morag na akong nasamokan niining mga pagbalibad kanako sa mga lugar aron pagbuhatan ug tigum, sa dihang akong ginabati ang pagpanguna sa pagbuhat niini. Busa siguro akong pangutan-on kung dili ba namo dalhon ang among tolda ug—ug ipahimutang kini, ug mopabilin nalang didto, nahibalo na mo. Mopahimutang dinhi sa parke nga dulaanan, o didto sa umahan, ug balhinon kini gikan sa usang dapit ngadto sa lain, sumala lang sa pagpanguna sa Ginoo. Ug ginabati ko nga kana maoy Iyang pagabuhaton. Nahibalo mo, adunay usa ka pananawon mahitungod niana. Ug kana siguro tingali ang hinungdan nga nagakahitabo kini . . . Karon, nahibalo mo, kadaghan nang higayon nga nagahunahuna kita nga makahahadlok kini tungod sa mga butang nga nagakahitabo, apan, nasayod mo, nga mahimo tingali'g Dios kana, kita n'yo, ang nagadala kaninyo ngadto niining mga butanga. Sa dihang, Iya nang gisulti kini, Iya kining buhaton.

²⁰ Sa pipila ka gabiing milabay, daghan kaninyo, diha sa mga usa na lang ka bulan sa dili pa ang pag-adto sa Africa, tingali'g daghan kaninyo nga aduna ang maong teyp, kaninyong mga tawo nga nakakuha sa maong mga teyp, sa, *Ang Pagpili Sa Usa Ka Pangasaw-onon*, nga giwali sa California. Sa katapusang mga gutlo nianang teyp, dili ko na mahinumduman nga atua pa gayud ako didto. Apan ang Espiritu sa Ginoo miabot sa ingon nianang pamaagi. Ako silang gipangsaway sa maong pamaagi sa ilang pagkinabuhi ug pagpamuhat, ug human nga ang Maayong Balita gikawali na ug gimantala pag-ayo sa ilang atubangan. Dayon, sa kalit lang, ang Balaang Espiritu misulti ug miingon, "Capernaum," kita n'yo, "ang maong siyudad nga ikaw nagatawag sa imong kaugalingon sa ngalan sa mga manulonda," mao kana ang Los Angeles, "ikaw nga gituboy ngadto sa Langit, apan igaunlod ngadto sa impyerno." Kita n'yo? Ug dayon pagkahuman niadto, aba, atua na ako sa gawas, ug si Igsoong Mosley ug si Billy ang kauban ko. Ug miingon sila... Mibalik ug milantaw, ug ang maong tibuok salog napuno gayud sa katawhan, mga ministro nagadanguyngoy.

²¹ Ug miadto ako ug gikuha ang Kasulatan. Miingon ako, "Aduna gayuy usa ka butang mahitungod niana diha sa Biblia."

Ug kadto mao si Jesus nga nagabadlong sa Capernaum, kadtong tanang siyudad sa baybayon nga Iyang giduaw. Aba, miingon Siya, "Capernaum, ikaw nga gituboy ngadto sa Langit, igaunlod ngadto sa impyerno." Siya miingon, "Kay kung gibuhat pa sa Sodoma ug Gomorra ug gibuhat diha kanimo, nagalungtad pa unta kini niining adlaw." Ug niadtong panahona, ang Sodoma ug Gomorra atua na sa ilalum sa dagat.

Ug igo nahuman kana, tingali'g mga usa ka gatus ka tuig o ingon niana, human sa panagna ni Jesus, ang Capernaum, ang bugtong siyudad sa daplin sa baybayon nga Iyang naduaw, usa ka linog maoy mipaunlod niini sa dagat. Ug nahibalo kamo nga mao kana ang laktod nga tubag sa California, ngadto sa Los Angeles.

²² Ug unya sa Tucson sa miaging adlaw, igo lang ko nakabalik, usa ka dakung linog ang nahitabo didto. Ug ang mga syentista atua sa telebisyon ginahulagway kini. Atua kini sa mga pamantalaan. Nga, ang yuta, sa miaging adlaw, nasiak gikan sa Aleutian Islands, o gikan sa Alaska, palibot sa Aleutian Islands, mga duha ka gatus ka milyas ang gilay-on paadto sa dagat, pabalik sa San Diego, milibot sa Los Angeles, ug migawas sa San Diego. Ug kini nangatumpag sa pipila ka mga pulgada. Ang mga kabalayan nangaunlod. Ang mga Motel mitidlum.

Ug ang mga syentista niining talay sa manunulti gi-gipangutana. Nagkanayon, "Bueno, mahimo ba kahang mahugno kana sa umalabot nga adlaw?"

²³ Matud pa, “Mamahimo? Mahitabo kini gayud!” Ug migamit siya’g syentipikong mga ngalan kon ngano ang linanay’ng mga bato nag. . . Kana maoy hinungdan niining mga linog sa kanunay, palibot sa San Diego ug paingon didto. Sa una pa kini tungod nianang dapit nga adunay lungag sa ilawum. Ug karon ang tanan niini nagasugod na sa pagkangadugmok, sama sa balas nga nagakahugno, ug karon ingon na lang kini sa usa ka taklap. Ug mikang-a kini, sa pipila ka mga pulgada. Mahimo nila ang paggamit sa radar ug kagamitan, ug sundan kanang liki, ug timan-an kini. Nakita ko kung hain na kini.

Ug mikang-a kini, sa pipila pa ka mga pulgada, tingali’g mga duha o tulo pa ka mga pulgada sa miaging adlaw, usab, human sa pagkahatag mismo niadtong maong panagna.

Ug kadtong mga nakighinabi sa maong mga syentista, miingon, “Bueno, tingali dili kini sa atong panahon.”

²⁴ Siya miingon, “Mahimong mahitabo kini sulod sa lima ka gutlo o sa lima ka tuig; apan kini mamahugno gayud.”

²⁵ Si Mrs. Simpson, dili ko masiguro kung ania ba siya uban kanato karon. O, akong makita si Igsoong Fred nagalingkod dinhi, apan wala ako mahibalo kung hain si Mrs. Simpson. Milakaw siya ug dala ang panagna nga akong gibuhat, mga 1935 o mga ingon niana, ug miingon, “Moabut ang takna,” nahisulat kini sa usa ka libro kon asa man, “nga ang dagat magadaligdig ngadto sa kamad-an.”

Tan-awa kon unsay magakahitabo. Kung kadtong linibo ka mga milyas kwadrado magakahulog ngadto sa linanay’ng mga bato sa yuta, ug magadahili, adunay minilyon ang mangamatay sa usa ka higayon. Ug kana maoy makapadala ug dagku kaayo’g mga balod! Hinumdumi, ang gilahumon niini ngadto sa Salton Sea, usa ka gatus o duha ka gatus ka pye ubos pa kaysa dagat. Kanang maong tubig hapit magaabot tingali ngadto sa Tucson, pinaagi nianang dagkung balod nga nagalatas ngadto didto. “Ug ang dagat magadaligdig ngadto sa kamad-an.”

Mga nasud nanagkabulag, ang Israel
nagakahigmata,
Mga ilhanan nga gitagna na sa mga propeta;
Ang mga adlaw sa Gentil naihap na, nga
adunay kalisang nga midat-og;
Pagbalik, O mga nangatibulaag, sa inyoha.

²⁶ Ania na kita sa katapusang panahon. Karon, ang Ginoo magapanalangin kaninyo sa madagayaon. Makasugod ako niana ug mahikalimtan ko na ang mahitungod sa oras. Mangawala kita, sa kalit kaayo, paingon ngadto sa Eternidad, sa gihapon.

²⁷ Ug karon sa San Marcos, sa ika-7 nga kapitulo ug sa ika-7 nga bersikulo, aron sa pagdala ug usa ka teksto alang niining

hilisgutan nga bag-ohay pa gibasa sa Unang Mga Cronicas 13. Aron sa usa ka teksto alang niini, gusto nako sa Marcos 7:7.

...kawang lamang ang ilang pagsimba kanako, sa pagpanudlo gipaka doktrina ang kalagdaan nga gihimo sa mga tawo.

²⁸ Karon, wala na ako'y nahibaw-an pa gawas sa Mensahe nga gikahatag na kanako sa Ginoo, ug mao lang kana ang tanan nga mahimo kong ikasulti. Ug karon, buot kong hisgotan ang bahin sa usa ka hilisgutan niining buntaga nga akong gitoohan nga maayo. Ug unyang gabii buot kong hisgotan ang bahin sa, "kalan-on sa tukmang panahon," kung itugot sa Ginoo: *Espirituhanong Pagkaon Sa Tukmang Panahon*, ug kon unsaon sa pagbaton Niini. Karon, niining buntaga: *Nagasulay Sa Pagbuhat Ug Bulohaton Sa Dios Nga Wala Sa Kabubut-on Sa Dios*.

²⁹ Ang Dios makagagahum. Ug atong makita dinhi kon unsay nabuhay ni David, diha sa pagbasa sa Kasulatan sa Unang Mga Cronicas 13. Ug siya'y... Ang iyang mga katuyoan maayo man. Apan ang Dios wala nagahatag kanato ug mga pahanungdan tungod sa maayong mga katuyoan. Adunay usa lamang ka paagi sa pag-alagad sa Dios, kana mao ang pagtuman sa Iyang kabubut-on diha sa Iyang mando. Ug ang Dios, ingon nga makagagahum, walay usa nga makasulti Kaniya kung unsay buhaton o unsaon pagbuhay niini. Iyang ginabuhay kini sa paagi, nga Iyang nahibaloan nga hustong paagi sa pagbuhay niini. Ug kana maoy nagahatag kanako sa maayong pagbati. Ug angay kini makapahimo kanatong tanan sa pagbati ug maayo, ug nakasiguro ko nga nagapabati kini kanato sa maayo. Tungod kay, ang usa makabaton Niini gikan *niining* paagiha, ug ang usa makabaton Niini *nianang* paagiha, ug ang usa sa lain na man nga paagi.

³⁰ Apan ang usa ka dakung butang, usab, bahin sa Dios, wala ta Niya biyai, karon, sa walay pagpanghibalo kung unsay Kamatuoran ug unsaon sa pagbuhay niini. Dili Siya mahimong makatarunganon, sa pagsilot kanato tungod sa pagbuhay sa usa ka butang nga wala nato hibalo kon unsaon niini sa pagbuhay, ug dayon tugotan kita nga mapangdol sa usa ka butang. Dili Siya ingon niana nga matang sa pagka Dios. Siya mao ang Dios nga nagasulti sa Pulong ug nagapaabot sa Iyang mga anak nga toohan Kini. Ug, busa, nasayod Siya kon unsa may pinakamaayo, ug kon kanus-a kini buhaton, ug unsaon kini sa pagbuhay. Adunay atong mga pangagpas niini, apan Siya ang nasayod.

³¹ Ug unya kung magpahimutang Siya'g usa ka pamaagi, nga maoy Iyang pagabuhaton, ug wala kita sultihi kon unsay magakahitabo ug unsaon niini sa pagkahitabo, nan kita, nga nangakapandol niini, mamahimong—mamahimong matarunganon

diha sa—sa atong mga pagkapandol; o, sa nagasulay sa pagbuhat ug usa ka butang, ang matag usa mamahimong matarungon. Apan adunay usa lamang ka paagi, ug mao kana ang Iyang Pulong.

³² Ug ang usa pa ka butang, si David dinhi, atong makita nga diha sa iyang kasingkasing gusto siyang mobuhat ug butang nga maayo. Wala siya’y dautang motibo, o walay dautang katuyoan. Apan, ang balay, o ang arka sa Ginoo, nahilayo sa—sa katawhan, ug gusto niyang dad-on ang arka sa Dios pabalik sa iyang dapit niini, aron ang katawhan makapangutana sa Dios bahin sa mga butang nga ilang gikinahanglan.

³³ Inay nga—nga pasagdan na lang kini, atong. . . Unsa kaha kung si Igsoong Blair ug ang amahan niining gamay’ng bata miingon, “Bueno, dili maayo kaayo kini, bag-ohay pa gisakitan ang bata, namatay. Siguro, butang lang gayud nga nahitabo”? Apan midangup sila dayon ngadto sa Dios.

³⁴ Unsa kaha kon ang maong babaye, ug ang iyang bana, usa ka ministro sa Maayong Balita, sa milabay’ng pipila ka gabii, o mga adlaw, sa dihang kanang babaye nga adunay nabali nga dugukan, nga bag-o pa mitindog. . . Ang doktor nag-ingon na, “Maparalitiko siya sa tibuok niyang kinabuhi.” Unsa kaha kon ang iyang bana ug siya miingon, “Bueno, minahal, lingaw-lingawon na lang nato ang atong kaugalingon niana”? Apan diha dayon ilang gibuhat ang butang bahin niini; midangup sila sa Dios. Pila man ka mga butang sa Biblia nga atong mahimong itudlo, nga kon giunsa sa maong mga tawo nga sa dihang anaa sa kalisdanan, nagadangup ngadto sa Dios!

³⁵ Bueno, kaniadto, sa ilang mga panahon, adunay ilang bugtong dapit nga tigumanan diin ilang matagbo ang Dios, ug mao kadto diha sa arka, ilalum sa dugo. Mao pa lamang kadto ang bugtong dapit sa katagbuan, ilalum sa maong Dugo. Ang halaran sa pagpasig-uli gisabligan, aron sa paghatag ug kalooy sa magsisimba, o sa maghahangyo, sa dihang siya nagaduol aron pagpangayo’g hangyo sa Dios. Ang Dios adunay usa ka pinasahi nga naandang pamaagi, ang pamaagi nga imo kinahanglan subayon, usab, mahitungod niana, ug dili Niya dawaton sa laing uban pa. Dili Niya dawaton ang laing uban pang paigo; sa pamaagi ra gayud nga Iya kining gipahimutang.

³⁶ Bag-ohay pa lang ako nga miwali sa usa ka Mensahe, nga daghan kaninyo ang nasayod Niini, nga, usa lamang ka dapit ang gikatagana diin nagapakigtugbo ang Dios sa magsisimba, ang maong dapit diin nga Iyang giingon, “Akong ibutang ang Akong Ngalan.” Kung atong mahikaplagan ang iglesia diin Iyang gibutang ang Iyang Ngalan, nan atong nahikaplagan na ang maong dapit. Miingon Siya, “Dili Ko ikaw panalanginan sa tanang mga ganghaan; sa mga ganghaan lang diin akong gibutangan sa Akong Ngalan. Akong ipahimutang kini diha sa

usa ka dapit, ug imo Ako kinahanglan tagbuon didto; ug mao lang kana ang maong dapit nga makigtagbo Ako kanimo.” Ug atong nakita, pinaagi dinha, kon diin Niya gipahimutang ang Iyang Ngalan, ug mao lang kana ang maong dapit diin Iyang ginatagbo ang magsisimba. Ug ang Iyang Ngalan mao si Jesus Cristo. Ang Ngalan sa Dios mao si Jesus Cristo.

³⁷ Si Jesus miingon, “Ako mianhi sa Ngalan sa Akong Amahan.” Ang matag anak nagatungha sa ngalan sa iyang amahan. Ug mianhi Siya sa Ngalan sa Amahan.

“Ug wala nay lain pang Ngalan sa silong sa Langit nga gikahatag ngadto sa mga tawo,” bisan kon kini ginatawag pa ug Methodist, Baptist, Presbyterian, iglesia ni Cristo, bisan pag giunsa kini pagbuhat. Adunay usa lamang ka dapit sa pagpakigtagbo nga ginatagbo sa Dios ang tawo, ug kana mao sa dihang anaa siya kang Jesus Cristo, ang bugtong dapit. Ug kining tanang karaang mga butang dinhi kaniadto ilalum sa Daang Tugon, nagtipo niana. Buot ko nga klaro nyo’ng masabtan kini. Karon, usa kini ka pagtulon-an pang-Sunday school. Adunay akong pipila ka Kasulatan ug mga sinulat nga nahisulat dinhi. Akong gihunahuna nga kini motabang kaninyo sa pagsabot, maingon nga ang tanang karaang mga butang nagakahitabo aron mahimong mga panag-ingnan alang kanato.

³⁸ Karon, atong makita nga ang Dios adunay pamaagi sa pagbuhat sa mga butang. Apan si David, ingon nga bag-ohay pang gipanalanginan sa Dios, ingon nga mao siya’y kaniadto, ug nahimong hari, nahunahunaan niya lang nga mobuhat siya ug usa ka butang alang sa Dios, bisan unsa pa. Ug wala niya gayud kini buhata sa hustong paagi.

³⁹ Atong mamatikdan, ang Dios nagapadayag sa Iyang Pulong sa Kaugalingon Niyang gitakda nang daan nga panahon. Karon, unsaon man ni Martin Luther sa pagkasayod bahin sa Mensahe karon? Unsaon man sa mga Presbyterian? Unsaon man ni Martin...o sa iglesia Katoliko ang pagkasayod sa mensahe ni Martin Luther? Unsaon man ni John Wesley ang pagkasayod sa mensahe ni Luther? Unsaon man ni Wesley ang pagkasayod sa Pentecostal nga mensahe? O unsaon man sa mga Pentecostal ang pagkasayod niini nga Mensahe? Kita n’yo? Iyang ginapadayag Kini sa Iyang mga panahon, tungod kay usa Kini ka Binhi. Ug sa nagatubo Kini ug nagahamtong, Iyang ginapadayag ang Iyang Kaugalingon.

⁴⁰ Sama sa init sa adlaw, aron mopaliki. Sa dihang kini linghod ug bag-ong turok pa, ipagitib kini gikan sa yuta, ang binhi; dayon padahonon kini niini, diha sa lain namang pagsidlak sa adlaw. Ang mainit nga adlaw mopatay niini kung pahinog na kini nga binhi...o panahon na sa pagpahinog. Busa, Iyang ginadumala ang adlaw ug ginadumala ang kinaiyahan, aron sa pagtuman sa Iyang Pulong.

Iyang ginadumala ang Iglesia, ang maong gipili nang daan, ang Pangasaw-onon, aron mosibo sa maong panahon nga ilang ginapuy-an.

⁴¹ Bisan gani ang kinaiyahan nagatug-an kanato karon, ingon nga atong makita nga nagakabahin-bahin na ang mga kanasuran, ang yuta nagakaunlod, ang maong panulat sa kamot anaa na sa bungbong. Atong makita ang iglesia ug ang mga kahimtang nga ania kini niini.

Atong makita ang Pangasaw-onon ug ang kahimtang nga Siya ania niini. Ug nasayod kita, pinaagi sa kinaiyahan, nga ang Iglesia nagapangandam na sa pagbiya. Daw sa unsa ka mahimayaong takna! Kini mao ang panahon nga gipangandoy sa tanang mga propeta nga makita, niining taknaa.

⁴² Karon, Iyang ginapadayag ang Iyang Pulong diha lamang sa tukmang panahon Niini. Si Martin Luther nagbasa sa mao rang Biblia nga atong gibasa. Si Wesley nagbasa sa mao rang Biblia nga gibasa ni Martin Luther. Ang mga Pentecostal nagbasa sa mao rang Biblia nga atong gibasa. Si Jesus nagbasa sa mao rang Biblia nga gibasa sa mga Fariseo, apan aduna ilang... Ginapaninguhaan pugngan ang mais diha sa pagkalinghod pa nga kahimtang, sa dihang nagkahinog na kini, nangapakyas sila sa pag-ila sa ilang takna.

Karon nabuhat ni David ang samang butang dinhi.

⁴³ Ginapadayag sa Dios kining Pulong diha sa tukmang panahon, ug ngadto sa Iyang mga ginapili nga padaygan Niini. Ginapili sa Dios kung kinsa ang Iyang ginapadaygan Niini. Iya nang gipili kana sa wala pa ang pagkatukod sa kalibutan. Ang tanan nga Iyang mga buhat dayag na kini daan Kaniya, gililong gikan sa tawo. Iya lang ginapadayag sila sumala sa Iyang pagbuot. Kini mao ang sa Iyang gipiling panahon, sa Iyang gipiling tawo. Ug wala gayud Siya nagpili ug usa ka pundok o sekta; kini mao ang usa ka tawong pinili, mao sa kon unsa Niya kini ginahimo.

⁴⁴ Kinsa may mopangahas nga korihian Siya, ug moingon, “Karon, Ginoo, nasayup Ka sa pagbutang *niining* tawhana sa maong bulohaton. *Kining* tawhana wala nagatoo sama sa among ginatohan?” Kinsa bay moingon sa Dios nga nasayup Siya niini? Nagkinahanglan kini ug medyo mas malapason pang tawo kay kanako, aron sa pagsulti Kaniya niana. Nahibalo Siya kon unsay Iyang ginabuhat. Nahibalo Siya kon kinsa ang pillion ug kon kinsa ang dili pillion, kon unsay buhaton ug kon kanus-a kini buhaton. Bisan unsa pa kadaku ang atong paghunahuna nga ang maong tawo angayan sa pagbuhat sa maong bulohaton, ang Dios nahibalo kon kinsay angay alang sa maong takna ug sa maong panahon, o sa takna ug sa tukmang takna sa pagbuhat niini.

⁴⁵ Ug ang tinuod, matuod nga Cristohanon; ang tinuod, matuod nga magtotoo sa Dios, nagahulat sa Ginoo alang niining mga

butanga. Paghulat sa imong bulohaton. Kung nagabati ka ug usa ka pagtawag, siguroha nga iya kini sa Dios. Siguroha nga husto kini. Siguroha nga napanahon kini kung unsay imong ginaingon. Ang Biblia nag-ingon, “Sila nga mga nagahulat sa Ginoo magabag-o sa ilang kusog. Sila manlupad pinaagi sa mga pako ingon sa usa ka agila. Sila manalagan ug dili makapuyan. Kung sila manlakaw, dili sila mangaluya.”

⁴⁶ Tan-awa si David, hari sa Israel, bag-ong dinihogan. Gibubo ni Samuel ang lana diha kaniya, ug siya ang pinili sa Dios, nga himoong hari sa Israel. Ug naangkon ni David kining pinadayag, sa pagdala sa arka sa Ginoo ngadto sa maong siyudad ni David. Karon, wala may dautan niana, apan, nakita ninyo, nabuhat ni David kini sa sayup.

⁴⁷ Karon, kini morag tan-awon nga kon ang usa ka tawo sama niana makaangkon ug pinadayag, usa ka bantugang tawo ingon nga haring pinili sa Dios, ang pinakabantugang hari nga nagpuyo sa ibabaw sa yuta, gawas kang Cristo, siguro, mao si David, tungod kay si Cristo Anak ni David. Karon, ang maong pinakabantugan nga tawo, bag-o pang dinihogan, nagagikan mismo sa Presensiya sa Dios, nakabaton ug pinadayag sa pagbuhat ug usa ka butang alang sa Dios, ug gustong buhaton kini alang sa Dios; apan ang pinadayag dili mao. Karon, usa kana ka dakung butang. May kalabotan kini sa atong hisgutanan: *Nagasulay Sa Pagbuhat Ug Bulohaton Sa Dios Bisa'g Wala Gitawag Sa Pagbuhat Niini.*

⁴⁸ Timan-i, nadawat ni David ang pinadayag. Ug timan-i, dili kadtong propeta, si Nathan-ael, ang nakadawat sa pinadayag. Si David kadto, ang maong hari, ang nakadawat sa pinadayag. Ni si Nathan-ael wala nakonsulta bahin niini. Wala gayud niya gikonsulta si Nathan-ael. Apan nakita ba ninyo dinhi, diha sa Unang Cronicas, iyang gipangutana ang mga capitan sa mga linibo, ug mga capitan sa mga ginatus? Wala gayud niya gikonsulta si Nathan-ael. Iyang gikonsulta ang katawhan, ug iya usab gikonsulta ang mga sacerdote ug ang mga teologo niadtong adlaw, ang mga escriba ug ang mga teologo. Nagkonsulta pag-una si David, miingon, “Kung kini, kini, iya sa Dios, manlugsong kita ug dad-on ang arka sa pakigsaad sa atong Dios, ngadto sa maong siyudad, ug atong pangutan-on ang Dios sa dili pa nato buhaton ang mga butang.”

⁴⁹ Apan miingon, diha sa mga adlaw ni Saul, “Ila nang giundang ang pagpangutana sa Dios, pinaagi sa—sa—sa arka, sa Urim, Urim Thummin. Ila nang gibiyahan ang pagbuhat niana.”

Miingon si David, “Karon mamalik ta sa Dios, kitang tanan! Mobalik ta diha sa hustong butang. Manlugsong kita ug kuhaon ang arka ug dad-on kini dinhi, dad-on ang Presensiya sa Dios,” sa laing pagkasulti, “pasulod sa siyudad. Magbuhat ta ug usa ka rebaybal. Atong dad-on pagbalik ang katawhan.” Apan aduna

siya'y pinadayag, nga morag maayo man, apan dili kadto mao ang kabubut-on sa Dios.

⁵⁰ Imbis nga pangutan-on ang tinubdan nga unta kinahanglan iyang pangutan-on, iyang gikonsulta ang iyang mga capitan, tungod kay bag-o pa siyang nahimong hari. Ug iyang gisunod kanang linyaha sa panghunahuna, kanang, sa iyang labaw'ng mga captain ug iyang bantugang mga tawo.

⁵¹ Dayon miadto siya sa iglesiang sa-ngalan-lamang ug nangutana kung magkaaduna ba sila'g rebaybal. Ang mga sacerdote, ang mga escriba, ang mga capitan sa mga linibo, ang mga capitan sa mga ginatus, ug gikonsulta niya sila. "Mao ba kini ang kabubut-on sa Ginoo?" Ug mitubag sila nga mao kadto. Apan, nakita ninyo, napakyas siya sa pagpangutana sa punoang tinubdan nga kanunay'ng ginapakighinabian sa Dios. Kita n'yo, napakyas siya sa pagkuha niini.

⁵² Karon maayo man ang iyang katuyoan. Maayo ang iyang motibo. Maayo ang iyang tumong, ug sa pagdala sa rebaybal sa maong siyudad, dalhon ang katawhan pabalik ngadto sa Dios. Apan wala gayud siya nagkonsulta sa paagi nga gitudlo sa Dios kaniya sa pagbuhat niini. Kita n'yo?

⁵³ Bisan gani ang tanang katawhan nanagkauyon, ug ang mga sacerdote, ug nga ang hari husto, "Ilang gikinahanglan ang arka nga mahibalik sa siyudad. Karon, gikinahanglan nila ang Presensiya sa Dios. Gikinahanglan nila ang usa ka rebaybal." Apan wala nagsaad ang Dios sa pagpadayag sa Iyang Pulong, diha sa tukmang panahon Niini, ngadto sa mga katawhan. Wala gayud Siya nagsaad nga ipadayag Kini ngadto sa hari, diha sa maong panahon. Ang Dios wala gayud nagausab, bisa'g gamay. Wala Siya nagsaad nga buhaton kana.

⁵⁴ Bisan pag unsa ka matinud-anon, ug unsa pa kamaayong mga motibo, ug unsa pa kamaayong mga tumong, ug unsa pa kagusto sa katawhan niadtong mga butanga ug nakita ang panginahanglan niini, adunay kabubut-on ang Dios sa pagpatuman niining mga butanga. Mao kana'y akong buot ipasabot sa hingpit, tungod kay buot kong himoon kini sa mao gayud aron nga inyong makita kini kon—kon ang Espiritu sa Dios nagapuyo ba kaninyo. Ug mao kana ang hinungdan nga nagdugay kaayo ako dinhi. Dili sa pag-usik ug oras kaninyong mga katawhan diha sa telepono, ug diha sa mga nakakonekta, apan maoy akong—akong gusto nga inyong makita kini. Kung mahutdan na mo sa panahon, nan pagkuha ug teyp. Nga anaa. . .

⁵⁵ Bisan kon unsa pa kini ka kinahanglanon, kon unsa pa ka nagkahiuyon ang mga tawo nga gikinahanglan kini, kon unsa pa nga kana mao ang Kamatuoran, aduna pay usa ka butang nga hibaloan. Mao ba kana ang kabubut-on sa Dios?

Karon, wala gayud ang Dios nagsaad nga Iyang ipadayag ang Iyang mga tinago ngadto sa Iyang mga hari, Iyang ipadayag ang Iyang mga tinago ngadto sa Iyang mga tawo.

⁵⁶ Usa ka butang susama sa panahon ni Miquias, ang anak nga lalaki ni Imlah. Samtang atong biyaan, dili ang teksto, kondili sa laing panahon, aron iapil kini ug himoong tinuod kaninyo, tinuod alang kaninyo, aron dili ninyo mapakyas kini.

⁵⁷ Adunay kaniadto, sa mga adlaw ni Miquias. . . Usa siya ka tawong kabus, ug gikan usab siya sa kabus nga banay. Apan, si Ahab, ang hari sa Israel, ingon nga usa ka nasud nailalum sa Dios, naghiklin siya'g tulunggaan ug nagmatoto ug mga pinili, personal nga pinili nga mga propeta, ug adunay upat ka gatus kanila sa tulunggaan. Ug mga bantugan silang mga tawhana. Dili sila yanong mini nga mga propeta. Mga Hebreohanon sila nga mga propeta, tinuod nga mga kalalaken-an. Ug ilang gikonsulta ang Ginoo pinaagi niining mga kalalaken-an. Ug matuod nga nagpanagna sila. Apan, nakita ninyo, diha sa pag-abot na sa tinuod nga pagpakigsangka, ang matag-usa kanila wala sa Pulong sa Dios ug sa kabubut-on. [Blangko nga bahin sa teyp—Ed.]

⁵⁸ Kay si Josafat milugsong gikan sa Jerusalem aron makigkita kang—kang haring Ahab, ug misul-ob sila sa ilang mga bisti, ug milingkod sa—sa mga ganghaan, ug ang mga propeta gidala sa ilang atubangan. Una, miingon si Ahab, “Adunay atong usa ka dapit dinhi sa Ramot-gilead nga sa tinud-anay nahisakop kanato.” Karon, kana ang MAO KINI ANG GINAINGON SA GINOO. Gibahinbahin kini ni Josue alang sa katawhan ug gihatag kana kanila, apan giagaw kini sa mga Filistehanon.

Ug miingon, “Ania ang atong mga anak nagkinahanglan ug tinapay, ug walay atong igong yuta nga katamnan ug makaon. Ug ang atong kaaway, ang mga Filistehanon, nagapakaon sa ilang mga anak, ang maong mga pagano, gikan sa mismong yuta nga gikahatag kanato ni Jehova nga Dios.” Matul-id kana kaayo. Ug miingon, “Ania, kita, ang katawhan sa Dios, napahimutang dinhi uban sa atong mga kaanakan, nanginahanglan, ug ang atong kaaway nagapakaon sa ilang kaanakan diha sa yuta nga niini gitawag kita sa Dios pagawas sa Egipto ug gikahatag kini kanato.” Makapaaghat kana sa teologo, dili ba? Siya miingon, “Adtoan ba nato ug atong kuhaon ang maong kayutaan nga gikahatag na sa Dios kanato?”

⁵⁹ Si Josafat miingon, “Oo, tabangan ko ikaw. Managsoon man kita. Ikaw anaa sa Judah, ug ako anaa—ako anaa sa Jerusalem.” O—o, nabali ba kaha kini? Sa pagtoo ko. . . Dili, husto kana. Nagtoo ako niini. . . si Josafat.

Bisan pa niana, si Josafat usa ka maayong tawo, usa ka hari, usa ka tawong matarung nga nahigugma sa Ginoo. Si Ahab maoy usa ka nagbugnaw nga magtotoo. Busa gidala nila sila, ug si

Josafat miingon, “Paminaw, atong pangutan-on ang Ginoo, pag-una. Ato kinahanglan hibaloong kini.” Tan-awa, kon gibuhat pa unta ni David ang sama sa gibuhat ni Josafat! Matud niya, “Dili ba nato kinahanglan buhaton kini?”

Ug dihadiha, ingon nga usa ka Israelinhon, si Ahab miingon, “Sigurado. Adunay akong upat ka gatus nga mga Hebreohanon, sama kanato, Hebreohanong mga propeta sa among kaugalingong organisasyon. Ug akong pangutan-on sila. Sila mga propeta.” Karon, nakita ninyo, igo lang . . .

⁶⁰ Moingon kamo, “Makapangdol kana kanako, Igsoong Branham. Usa ka propeta?” Oh, oo. Dihay usa sa panahon ni Jeremias, ang miingon nga duha lamang ka tuig sila didto. Ang Ginoo miingon kang Jeremias, “sa kapitoan.” Nagsangon ug usa ka yugo diha sa iyang liog, ug gibali kini sa propeta, si Hananiaas. Apan nasayod na man kamo kon unsay nahitabo kaniya. Oh, oo. Kinahanglan magpabilin kamo sa Pulong.

Busa kining mga propeta miadto ug nanagna, ug miingon, “Tumungas kamo! Ang Ginoo magauban kaninyo.”

⁶¹ Ug ang usa kanila, nagtoo ko (nalimot ko sa iyang ngalan karon) ang pangulo, si Zedechias, nagtoo ko, miingon, misangon siya’g duha ka puthaw’ng mga sungay ug miingon, “MAO KINI ANG GINAINGON SA GINOO. Pinaagi niini,” karon kanang tawhana matinuuron, “imong itulod pabalik ang imong kaaway balik deretso sa ilang kayutaan, ug kuhaon kon unsay iya sa Dios. Gikahatag na kini kanimo.” Dili ako nagatoo nga usa siya ka tigpakaaron-ingnon. Nagatoo ko nga usa siya ka maayong tawo. Nagatoo ko mao sila kadtong mga propeta.

⁶² Moingon ka, “Mga Propeta?” Oo! Hinumdumi, ang mismong tawo nga mitugot sa pagpatay kang Jesus Cristo, nagtagna, tungod kay bulohaton niya kadto. Siya mao ang labaw’ng sacerdote niadtong tuiga. Ug maingon nga anaa siya sa maong katungdanan, ug naghupot nianang maong katungdanan, ang Espiritu sa Dios mikunsad kaniya. Wala kana nagpasabot nga siya luwas na o bisa’g unsa mahitungod niini. Ug nanagna siya, si Caifas, tungod kay ang iyang katungdanan maoy nagbuhat niini.

⁶³ Ug kining mga propeta, ingon nga mga propeta, sa katungdanan nga pagkapropeta, nagpanagna. Ug ang Espiritu sa Dios mikunsad diha kanila, mga kalalaken-an nga adunay mga hiyas sa Espiritu.

⁶⁴ Akong maila nga nagapakigsulti ako ngadto sa kasiyama’g-siyam ka porsyentong mga Pentecostal. Apan sa mga kalalaken-an sa daghang higayon, sa tawo, ang Dios makagamit kanila, mohatag kanila’g gasa, ug ang katawhan mopig-ot niadtong maong mga tawo. Kung sila dili gayud ang hingpit nga gitawag ug pinadala sa Dios, siya mopahimo nianang tawhana o bayhana sa pag-ingon ug usa ka butang nga dili sa Iyang kabubut-

on, tungod kay ang maong mga tawo nagapugos kanila sa pagbuhat niini.

⁶⁵ Daw sa unsa ko gikinahanglan maabtan ang atong kaugalingong kabus na pastor dinhi bahin niini. Didto sa kakahoyan usa niana ka buntag, mga alas tres ang takna sa kabuntagon, nag-ingon, “Lakaw sultih ang Igsoong Neville!” Miadto ako kanimo, dili ba, Igsoong Neville?

⁶⁶ Ang matag-usa, “Igsoong Neville, pagpanagna bahin kanako. Suginli ako *niini* o *niana*.” Kita n’yo? Ginapasulti na ninyo siya kon ingon niana sa mga butang nga dili magakahitabo.

“Sila nga nagahulat,” aron sa paghibalo sa kon unsay buot buhaton sa Ginoo. Kita n’yo?

⁶⁷ Busa kining mga tawhana nagtan-aw niini diha sa natural nga pagsabot, “Ato kini.” Apan, nakita ninyo, wala nila gihibalo ang Pulong ug ang kabubut-on sa Dios.

⁶⁸ Ug unya si Miquias milugsong, ug siya may pananawon. Iyang gisusi, una, namatikdan ninyo. Miingon, “Hulata. Itugyan kanako karong gabii. Tugoti ko nga hibaloon, ug ugma tingali makatubag na Ako kaninyo.” Wala siya mismo nagdalidali, “MAO KINI ANG GINAINGON SA GINOO,” sama, sa ginakauyunan sa ubang mga propeta. Siya miingon, “Mosulti lang ako sa kung unsay ginaingon sa Dios.”

Ug sa pagkasunod adlaw, atong mahibaloan, ang Dios miingon kaniya kung unsay mahitabo. Ug kadto sukwahi gayud kaayo ngadto sa uban. Sa tibuok tulunggaan, sukwahi kini. Ug bisan gani ang usa kanila miduol ug gisagpa siya sa nawong, tungod niini. Apan, kita n’yo, naghulat siya. Unya sa dihang naghulat siya, iyang giindig ang iyang panagna, ang iyang pananawon, uban sa sinulat nga Pulong, ug tukma kadto sa Pulong.

⁶⁹ Kon adunay nagaingon nga sila’y “may pinadayag sa pagbautismo sa mga tawo sa Ngalan sa ‘Amahan, Anak, Espiritu Santo,’” supak kana sa Pulong. Wala sa uban pa kanila ang mibuhay gayud. Sa dihang nagaingon sila, nga, “Oh, barugan namo, ug *niini*, *niana*, ug ang *uban*,” ug uban pa, sukwahi kana sa Pulong. Sa dihang sila nagaingon nga sila “dili sila nagatoo sa maong binhi sa serpente,” sukwahi kana sa Pulong. Tanan kining uban pang mga butang, kana sukwahi sa Pulong. Kinahanglan sumala kini sa Pulong ug anaa sa panahon.

⁷⁰ Karon, kung nabuhay lang kadto ni David. Paabot na ang arka, apan dili niadtong panahona; walay luna alang niini.

⁷¹ Himatikdi sa ilang paglugsong karon sa pagkuha sa arka, ang tanang mga halangdon miingon, “Kana mao gayud ang butang nga pagabuhaton, David. Himaya sa Dios! Kinahanglan nato ang usa ka rebaybal.” Mao kadto ang matuod nga

Pentecostes, sa karon; Baptist, Presbyterian. “David, ikaw maoy among hari! Kamong tanan. . . Si Capitan *Mao kini-ug-mao kana*, ug si Komandante *Mao kini-ug-mao kana*, ug si Heneral *Mao kini-ug-mao kana*, motambong sa imong tigung. Aba, ginaingon nila nga mao gayud kana ang butang nga pagabuhaton, David. Anaa midapig ang tibuok nasud kanimu.”

Mao kana ang nagakahitabo karon. Wala nako gikinahanglan ang maong nasud. Dios ang akong gikinahanglan, kung wala may bisan kinsa nga mobarog.

⁷² Atua kang David ang tanang mga capitan. Aduna kaniya ang pakigduyog sa kagamhanang militar. Aduna kaniya ang pakigduyog uban sa tanang mga denominasyon, uban sa tanang mga teologo, uban sa tanan, ang tanan na nagapakig-uyon kaniya. Mao pud kang Ahab, ug ang uban pa diha sa Kasulatan; apan wala kaniya ang Dios, tungod kay gawas siya sa kabubut-on sa Dios. Nagalaum ako nga atong nasabot kini.

⁷³ Himatikdi, ilang nabuhat ang matag relihiyosong butang nga ilang mahimo. Tingali nagbutang pa sila ug mga pahibalo ug tanan na, “Dakung rebaybal! Ang arka mahibalik na. Magkaaduna na kita’y usa ka rebaybal. Atong buhaton *kini*.”

⁷⁴ Himatikdi, nagpadala siya’g mga mag-aawit. Nagpadala siya’g mga tawo uban sa mga alpa, uban sa mga trumpeta, ug ilang nabuhat ang matag relihiyosong butang nga ilang nahibaloan unsaon sa pagbuhat; ug bisan pa niana ang Dios wala diha niini.

Daw sa unsa nga atong makita kini nga nagabalik pag-usab, dili ba?

⁷⁵ Ila nang gidala ang tanang mag-aawit. Ilang gidala ang mga manunugtog ug alpa, ang manunugtog sa trumpeta; ang mga kababayan-an, ang kalalaken-an, ug kutob niadtong nagaawit. Ila na silang gipangdala didto, ug gipangbuhat nila ang matag relihiyosong kalihokan.

Dili ko gusto isulti kini, apan kinahanglan nga isulti ko kini. Mao pud niini ang mga denominasyon karon, ang Pentecostal ug tanan na, ginabuhat na ang matag relihiyosong kalihokan, sa pag-awit ug pagsinggit.

⁷⁶ Himatikdi, si David misinggit sa tibuok niyang kusog, ug mitiyabaw siya, ug milukso siya, ug gibuhat niya ang matag relihiyosong kalihokan nga mahimo niya; ug sa gihapon ang Dios wala niini. Ug ang iyang motibo, ug ang iyang katuyoan, ug ang tanan na matarung man; apan gibuhat niya kini sa sayup nga paagi. Kita n’yo? Iya nang nabuhat ang tanang maong relihiyosong kalihokan; misinggit, miawit, adunay pinasahing mga mag-aawit, pinasahing manininggit, tanang uban pa. Nanagsayaw sila diha sa espiritu. Ila nang nabuhat ang tanang mga relihiyosong butang.

⁷⁷ Daw sama kini sa atong dagkung mga krusada sa atong panahon. Gusto nilang kabigon ang kalibutan ngadto kang Cristo. Walay ingon nianang butanga. Dagkung pangdinaghang mga rebaybal, dagkung mga panghitabo; kung naila pa lang unta nila, nga kanang maong adlawa miagi na. Paadto na siya sa kaalautan. Apan nanagpatindog pa sila, sa mga krusada, mga organisasyon, ug tanan na. Apan, ang resulta sama lang sa gihapon kanhi sa panahon ni David, wala kini magpulos.

⁷⁸ Moadto ta ug mohimo sa usa ka rebaybal. Ang atong bantugan, ang pipila sa atong bantugang mga ebangelista karon, nagaingon sila nga adunay ilang katloan ka libong mga kinabig, sulod sa unom ka mga semana; ug sa usa ka tuig human niadto, balikan, dili sila makakaplag ug katloan. Adunay butang nga sayup. Kon unsa man kini, kini maoy sama lang sa butang nga nabuhat ni David. Inilang mga halangdon, gamhanang mga tawo, bantugang mga magwawali, mas dagkung mga tulunggaan, dagkung kagamhanan, apan bisan pa niana nagapangutana sila sa gihapon sa karaang denominasyon imbis nga nagatutok sa dagway sa Pulong sa Dios ug tan-awon kon takdo na sa panahon. Dili ka makatanum ug pipila ka matang sa pagkaon kondili sa takdo lang nga panahon sa tuig.

⁷⁹ Karon atong tan-awon kung unsay nahitabo. Bisan pag ang ilang... Ang ilang relihiyosong mga pagbati ug mga butang maayo gyud, ang ilang mga katuyoan maayo gyud, ang ilang krusada maayo gyud, ang ilang pag-awit maayo gyud, ang ilang mga pagsayaw maayo gyud, ang ilang pagsinggit maayo gyud, ang ilang musika maayo gyud, ug anaa kanila ang arka. Unsa may pulos sa arka kung wala ang Dios? Usa lang kini ka kahon sa kahoy, duha ka mga papan nga bato.

Sama ra kana sa pag-ambit sa komunyong, nga nabautismohan na. Unsa may mahimo nga kaayohan nga mabautismohan kung wala ka una maghinolsol? Unsay maayo nga ginahimo niini, moambit sa komunyong, mamahimong tigpakaaron-ingnon, kung dili mo gikinabuhi ang maong kinabuhi ug ginatooan ang tanang Pulong sa Dios? Dawaton ang uban Niini, ug dili ang tanang uban pa Niini, nagapakita kini nga adunay sayup.

⁸⁰ Karon, kung kining tanan nagakahitabo, ato nang tan-awon karon kon unsay nagakahitabo kon ang Dios, ug ang Iyang panahon ug ang Iyang takna, wala panumbalinga; kondili ang pangagpas lang sa mga tawo.

⁸¹ Daghang mga tawo ang nag-ingon kanako, “Nganong dili ka moari ug mobuhat ug usa ka panagtigum? Bueno, amo kang ginatawan. Pirmahi *kini, kana, o ang lain pa.*”

Paghulat! Tingali'g gusto ninyo kini, apan unsa may ginaingon sa Dios bahin niini? Daghang mga tawo ang nag-

ingon kanako...adunay akong inbitasyon, aduna ko'y mga pagpakighinabi, personal nga mga pagpakighinabi ug ingon-anang mga butang, nga naghulat sulod sa usa katuig. Paghulat! Unsaon ko sa pagkasayod kon unsay igasulti gawas ang Dios magpahibalo kanako kon unsay igasulti? Kita n'yo, kinahanglan maghulat! Mao kana ang hinungdan nga miingon ako, "Isulat kana. Tugoti akong tan-awon kon unsay Iyang gisulti." Kita n'yo? Paghulat! "Sila nga nagahulat sa Ginoo magabag-o sa ilang kusog." Husto kana?

⁸² Himatikdi, ang mga sacerdote lamang ang ilang gipangutana niadtong adlawa, ang mga teologo, ang mga denominasyon. Ug himatikdi, pinaagi sa pagbuhat niana, ang pagkonsulta sa mga sacerdote ug ang pagkonsulta sa kongregasyon, pagkonsulta sa katawhan, gibuhat nila kini nga sayup.

⁸³ Himatikdi, ang arka mao ang Pulong. Nasayod kita nga husto kana. Tungod kay, ang arka mao si Cristo, ug si Cristo mao ang Pulong. Kita n'yo? Ang arka, o ang Pulong, wala gipahimutang sa iyang nahaunang, gikatagana nang daan, orihinal nga gikataganang pwesto. Oh, ayaw gyud pakyasa sa pagsabot niini, iglesia!

Ang tanan hingpit na, ug ang tanan maayo na kon tan-awon, mora ug nagasingabot na ang usa ka dakung rebaybal; apan tungod kay gipakyas nila ang pagkonsulta sa tukmang tawong mahitungod niini! Ila nang gikonsulta ang mga sacerdote, gikonsulta na ang mga halangdon, gikonsulta na ang mga teologo, gikonsulta na ang mga mag-aawit, ug napaghiusa na ang tanan sa usa ka pagkahiuyon, ug ang dakung organisasyon sa kasundalohan, ug usab ang—ang—ang maong mga puwersa sa nasud. Ang tanan anaa na sa panagkauyon alang sa usa ka dakung tigum, apan napakyas sila sa pagkonsulta sa Dios. Mao pud kaniadto si Ahab, ingon usab ang uban. Unsang taknaa!

⁸⁴ Karon ayaw kini'g pakyasa. Napakyas sila sa pagsabot niini, tungod kay wala sila nangonsulta. Ug pinaagi sa pagbuhat niana... Bantayi. Tungod sa pag-adto sa mga sacerdote, tungod sa pag-adto sa mga teologo, ug tungod sa pag-adto sa puwersa sa mga kasundalohan, ug wala gani ginapanumbaling ang pinadala sa Dios nga ilang mensahero sa maong panahon, si Nathan, nasayup sila sa pagbuhat niini. Miadto sila ug gikuha ang arka ug gipahimutang kini diha sa ibabaw sa bag-ong caro, gibutang kini diha ibabaw sa bag-ong caro, o, "usa ka bag-ong denominasyon nga pagasuguran," ug dili sumala sa gikahatag sa Dios, nga gikataganang paagi sa pagdala niini. Kinahanglan pas-anon unta kadto sa mga abaga sa mga Levita. Apan, nakita ninyo, kung magsugod ka nga sayup, magpadayon ka nga sayup.

⁸⁵ Kung ang usa ka bala nga angay unta ipunting ngadto sa usa ka tumong, ug imong malihok gamay ang tubo sa usa sa usa ka libo niini, sa sugod pa lang, diha sa usa ka gatus ka yarda

mapahilayo ka na sa upat o lima ka mga pulgada. Sayup ka na sa pagsugod.

⁸⁶ O Dios, tabangi kami sa pagkasayod nga kining butanga misugod na sa sayup, niining dagkung mga krusada sa maong panahon, ug sila nga maoy gitawag kuno. Wala nakonsulta ang Dios bahin niini. Ang mga pari ug mga relihiyosong tawo gikonsulta na. Ang organisasyon gikonsulta na. “Bueno, makuha ba ninyo *kini-ug-kana?* Motoo ko, kung atong mahiusa ang tanan!” Ayaw’g ihiusa ang tanan. Hibaloa lang ang Pulong sa Dios bahin niini.

⁸⁷ Unya atong makita nga, sa dihang ilang ginabuhat kana, unsay ilang ginabuhat? Nagapadayon sila mismo diha sa ilang mao gihapong karaan nga relihiyosong programa, nga wala sa Pulong sa Dios ug sa kabubut-on sa Dios. Kanang maong butanga patay na, sa milabay nang mga katuigan, silang mga nauga nang mga butanga sa kanhing mga katuigan.

⁸⁸ Nauga na kini sa mga adlaw pa ni Ginoong Jesus. Wala kini nila masayri. Matud pa, “Kung nakaila kamo kang Moises, nakaila kamo unta Kanako, tungod kay nag-ingon man si Moises nga moabut Ako.”

Miingon, “Ang among mga ginikanan nangaon man ug manna didto sa kamingawan.”

⁸⁹ Miingon, “Nangamatay man silang tanan!” “Mga buta,” ginganlan Niya sila, ang mga Fariseo, mga tigpangulo sa relihiyon. “Gawas kon kamo motoo nga Ako mao Siya, mangamatay kamo sa inyong mga sala.” Apan wala nila gibuhat kini. Nakapahimutang na sila pag-ayo sa ilang mga pamaagi. Ila kinahanglan buhaton kini sa ilang kaugalingong pamaagi.

⁹⁰ Sa ingon niana nga pamaagi nga gibuhat ni David kini. Gibuhat niya kini diha sa iyang pamaagi, busa siya miingon lamang, “Nahibalo kamo’g unsay akong buhaton? Nagauswag kita.” Aduna siya’y pinadayag. “Nagauswag na kita karon, busa magbuhat kita ug bag-ong pamaagi. Ang mga adlaw sa mga milagro nangagi na, busa magbuhat kita ug laing organisasyon. Magbuhat kita ug usa ka bag-ong caro, nga nagapakita nga nagsugod na ang usa ka bag-ong butang.” Daw sa unsa ka mini nga panagna!

⁹¹ Kinahanglan nga mobalik ka sa pamaagi nga giingon sa Dios nga buhaton kini. Ilang gipahimutang kini diha sa ibabaw sa abaga sa mga Levita, ug kana maoy anaa sa ibabaw sa kasingkasing. Ang arka, ang Pulong, dili pagadad-on ibabaw sa usa ka bag-ong denominasyon, diha sa mga teorya sa usa ka tawo, kondili diha sa kasingkasing. Ang Pulong sa Dios dili mahimong gunitan sa mga denominasyon; Kini kinahanglan pagakuptan diha sa kasingkasing sa tawo, diin ang Dios makasulod didto ug ipadayag ang Iyang Kaugalingon. Ug kung

ginapadayag niya kini sumala sa Pulong, kini iya sa Dios; kung kini dili man, nan kini dili.

Ug, dayon, ang Pulong nianang panahona! Sigurado, ang usa ka Fariseo makaingon, “Kinsa may nag-ingon kanato nga dili nato mahimo *kini* ug mahimo *kana*? Si Moises ang naghatag kanato niining mga sugo.”

“Apan si Moises miingon man pud . . .”

Si Satanas miingon, “Aba, nahisulat na kini, ‘Iyang ihatag ang Iyang Ang- . . .’”

⁹² “Ug kini nahisulat man pud,” ang giingon ni Jesus.

Ang panahon, ang takna! “Kung nakaila kamo kang Moises! Adunay usa nga musumbong ninyo, si Moises. Kung nakaila kamo kang Moises, nakaila unta kamo Kanako,” Siya miingon, “tungod kay si Moises nagsulat man mahitungod Kanako. ‘Ang Ginoo nga inyong Dios magpatindog ug usa ka Propeta sa inyong taliwala, taliwala sa inyong mga kaigsoonan; Siya maoy ilang patalinghogan.’” Kung nakaila pa sila kang Moises, nakaila na unta sila Kaniya.

⁹³ Karon paminaw, pag-ayo, ayaw’g palabya kini karon. Kita n’yo, ang unang butang, sa dihang ilang gikonsulta ang mga sacerdote, gikonsulta ang mga halangdon, gikonsulta ang kasundalohan, gikonsulta ang tanang maong kongregasyon, ang mga silingan, aron sa paghiliusa alang niining dakung tigum nga umalabot, napakyas sila sa pagbuhat niini sa husto. Wala nila gikonsulta ang Dios. Ug, pinaagi sa pagbuhat sa ingon, wala ginabalikan ug tan-awon kung unsa nang panahon kadto!

⁹⁴ O, igsoon, pamati. Kon unsa nang taknaa ang atong ginapuy-an? Kon unsa na ang maong panahon? Kon unsa nang taknaa nga ania na kita? Dili na mao kini ang panahon alang niining mga butanga nga ilang ginahisgotan. Milabay na kana. Ang paghukom andam na karon. Imo na kining makita nga nagapakita na. Nahinumduman ba ninyo ang maong bato didto sa maong bukid? Takna na sa paghukom! Nahinumduman ba ninyo ang maong pinadayag, o ang panan-awon mahitungod sa Pangasaw-onon? Ipasubay lang Siya sa maong lakang. Ayaw pasagdi Siya nga mahigawas sa maong lakang.

Himatikdi, “Ibabaw sa mga abaga sa mga sacerdote!”

⁹⁵ Ug si David ug ang tanang mga sacerdote, nga mao gayud ang mas nasayod unta, apan unsa man kadto? Ang mga sacerdote labi pang nasayod unta. Ang mga escriba, mga teologo, labi pang nasayod unta, tungod kay ang Pulong nag-ingon nga dili kana pagabuhaton.

⁹⁶ Ug karon sa dihang buot nilang moingon, “Oh, si Jesus Cristo dili na mao sa gihapon kagahapon, karon, ug hangtud sa kahangturan. Kana maoy salabutanong telepatiya. Kana mao

kini, kadto, o lain pa.” Napakyas sila nga makita ang gisaad nga Pulong. “Oh, sa adlaw pa kana nga nanglabay na.”

Si David miingon, “Oh, bueno, kadiyut lang. ‘Sa ibabaw sa mga abaga sa—sa mga sacerdote, kaniadto pa kana sa paggawas ni Moises. Sigurado, atong, ato nang ibutang kini diha sa ibabaw sa bag-ong caro karon. Aduna ko’y pinadayag niini.”

⁹⁷ Ang mga sacerdote miingon, “Amen, David!” Kita n’yo, nahaylo sa ilang bag-ong konsehong ekumenikal, nga silang tanan kinahanglan managkahiusa ug buhaton kini sa *niining* paagiha ug *nianang* paagiha, mao kana’y nakapandol sa mga sacerdote. Wala gayud nila gikonsulta ang hustong tawo. Wala nila kini gibuhay sa husto, busa nagkaproblema sila. Oo.

⁹⁸ Nahadlok ako, diha sa kadaghang mga butang karon. . . Sa dihang ang usa ka bantugang magtutudlo, usa sa pinakabantugan sa Pentecostal, mitindog sa atubangan sa maong relihiyosong pundok sa miaging gabii didto sa Chicago. Aduna unta ko’y tigum niana kauban sa maong mga Business Men; apan nagdahum ko nga mahimong atua pa ako sa Africa niadtong panahona, apan mao pa’y akong pagbalik usa ka adlaw sa dili pa kadto misugod. Ug gipili nila ang usa ka bantugang utokan nga Pentecostal, ug misaka siya ug giingnan sila nga kining kalihokang ekumenikal usa ka butang nga iya sa Dios. Ug miingon nga ang tanan kanila nagapamalik na, bisan ang Katolikong iglesia magabalik na sa orihinal niini nga kahimtang, tanan managsulti na’g mga dila ingon nga kalig-onan, ug uban pa. Ug wala nahibalo nga kana lit-ag sa yawa!

⁹⁹ Ug usa ka tawo nga wala ko hiilhi. . . Usahay nagatanum ka na ug binhi; wala ka mahibalo kung unsay mahitabo. Apan ang pangulo sa Full Gospel Business Men, sa paglingkod na sa maong bantugang mamumulong, miingon siya, “Dili ako mahilig sa pagsulti’g mga butang batok sa atong mga manunulti, apan dili kana mao ang paagi nga giingon ni Igsoong Branham nga mahitabo. Kondili nag-ingon siya nga magahatod kana ngadto sa maong marka sa mapintas nga mananap.”

Siya miingon, “Apan si Igsoong Branham wala masayod kung unsay iyang ginasulti.”

Miingon, “Kami . . . nagatoo nga nasayod siya.” Kita n’yo?

¹⁰⁰ Ug sa Chicago, miingon pa, “Pila man ang ania dinhi ang gusto nga mosaka ko ug mohatag sa akong hunahuna mahitungod niini?” Misugod ang pagtiyabaw ug pagsinggit.

Kita n’yo, nagatanum ka’g mga binhi; wala ka masayod kung unsay mahimong mahitabo. Pagpadayon lang sa pagpugas ug Binhi. Sa dihang nagaabot na kanang taknaa, ang uban kanila maoy. . .

101 Sama kang Tomas, siya ang morag maoy katapusan na nga makakita sa Ginoo. Apan, kinahanglan niya nga makita Siya, aron sa pagtoo Kaniya. Kita n'yo, sa dihang nakita nila kini nga nagakahitabo. Oh, si Tomas nagasulod na, apan ulahi siya ug diyutay.

102 Karon sa ilang nakita ang maong mga butang nga gipanagna na, ug ang ginaingon MAO KINI ANG GINAINGON SA GINOO, nagakahitabo na, nan moingon sila, "Hatagi kami'g pipila sa inyong Lana." Kita n'yo?

103 Apan karon himatikdi, ang maong impluwensiya. Usahay ang mga bantugang lalaki nagakatapok. Inyong madunggan silang nagaingon, "Si dakung *Mao kini-ug-kana*, ug si dakung *Mao kini-ug-kana*, ang among dagkung. . ." Ayaw gyud buhata kana.

Walay ni mga dagku sa atong taliwala. Adunay usa lamang nga Bugtong daku, ug mao kana ang Dios. Managsoon kita nga mga lalaki, mga babaye. Dili ko igsapayan kung ikaw nagapastor ug iglesia nga adunay lima ka tawo niini, wala kana nagapahimo kanimong gamay; nagapahimo kana kanimong usa ka igsoon, kita n'yo, kung matinud-anon ka diha sa Pulong sa Dios. Dili igsapayan kon unsa man, kon unsaon man; dili ka mahimong gamay. Ang Dios walay gamay'ng anak ug dakung anak. Aduna lang Siya'y mga anak. Managsama ra silang tanan.

104 Himatikdi, ang Dios Mismo mikanaug gikan sa mga marpil nga palasio sa Himaya, aron mahimong usa kanato. Karon kinsa man ang maoy daku? Mikuha. . . Wala mikanaug dinhi aron sudlan ang porma sa pagkapari, kondili ang pagka-ulipon. Mihugas sa mismong lapok nga Iyang gibuhat, ang mga tiil sa Iyang apostoles ug sa uban pa. Karon kinsa ang maoy daku?

105 Apan giimpluwensyahan, kining maong mga tawhana. Wala sila nakasabot. Nagdahum sila nga adunay bag-ong butang nga mahitabo, wala, usa ka butang nga wala isulti sa Dios nga mahitabo. Gihimo nila kini sa sayup nga paagi.

Mao kana ang tanan niining kadasig, sa dihang ang. . . misugod kaniadto, sa dugay nang panahon, ang matag denominasyon gikinahanglan nga adunay Balaanong mananambal; ang matag denominasyon kinahanglan adunay *niini*, *niana* o *lain pa*. Ang matag denominasyon gikinahanglan adunay usa ka gamay'ng David. Ang matag usa nagkinahanglan nga adunay *niini*, *niana*, o *lain pa*. Nakita n'yo kon unsay nahitabo? Nagbuhat kini ug mao rang butang nga gibuhat dinhi niini. Mao rang butang. Ang impluwensiya!

106 Ang Pulong alang sa maong panahon, sa maong takna nga ilang ginapuy-an, wala gitagad.

107 Himatikdi, "sa mga abaga sa mga Levita," mao ang orihinal, ang giandam na nga pamaagi sa Dios sa pagbuhat niining mga

butanga. “Ipapas-an kanang arka diha sa mga abaga sa mga Levita.” Ang bisan unsang butang nga gawas niana nakasupak na. Kon unsa may Iyang giingon, kana maoy Iyang ipasabot. Ang Dios dili mausab. Kana maoy hinungdan, sa pagpabilin uban sa Iyang Pulong! Adunay akong Kasulatan, oo, sa Unang Cronicas 15:15, kung gusto ninyong isulat kana. Himatikdi.

¹⁰⁸ Karon himatikdi, diha, sa pagsunod sa Dios. Karon gusto ko nga inyong medyo ipatik kini sa inyong hunahuna. Aron sa pagtuman sa mga sugo sa Dios, aron sa pagbuhat ug bisan unsang butang nga matarung alang sa Dios, aron sa pagbuhat—pagbuhat ug usa ka bulohaton sa Dios sa husto, adunay lima ka mga gikinahanglan, aron sa pagbuhat ug bulohaton sa Dios sa husto.

¹⁰⁹ Karon si David nagabuhat ug usa ka bulohaton sa Dios. Ginabuhat niya ang tanang butang nga iyang nahibaloan sa pagbuhat, gawas sa pagtalikod sa Dios. Kita n’yo? Iyang ginabuhat ang usa butang nga husto, butang nga makapaayo alang sa katawhan, butang nga makapaayo alang sa iglesia.

¹¹⁰ Apan adunay lima ka mga gikinahanglan. Gusto kong hinumduman ninyo ang mga niini. Bisan pa kon unsa ka matitud-anon ang tawo sa pagbuhat niini, sa pagbuhat ug usa ka bulohaton sa Dios, kini, kining lima gikinahanglan nga maanaa diha.

Una, kini kinahanglan nga sa Iyang panahon ang pagbuhat niini.

¹¹¹ Unsa kaha kon—kon si Moises moanhi, moingon, “Magbuhat ta ug arka ug palutawon sa Nile, sama sa gibuhat ni Noe”? Ang panahon ni Noe tukma tanan alang sa arka, apan dili sa iyang panahon.

¹¹² Unsa kaha kon moanhi si Jesus, miingon, “Karon sultihan Ko kamo kon unsay atong buhaton. Manungas lang kita ngadto sa maong bukid, sama sa gibuhat ni Moises, ug magkuha ug bag-ong pahayag nga mga kasugoan”? Kita n’yo? Huh-uh! Siya kadtong maong kasugoan. Kita n’yo?

¹¹³ Kinahanglan anaa ka diha sa Iyang takna. Kinahanglan anaa kini diha sa Iyang panahon. Nasabtan ba ninyo kana karon? Kinahanglan anaa diha sa Iyang takna. Kinahanglan anaa kini diha sa Iyang panahon, sa maong takna ug panahon.

¹¹⁴ Ug kinahanglan nga pinasikad kini sa Iyang Pulong nga gikapamulong na. Kinahanglan gayud. Dili ko igsapayan kon unsa pa kaayo ang imong ginasulti nga kinahanglan mao *kini*, o kinahanglan mao *kana*, o kinahanglan mao *kini*. Kinahanglan pinasikad gayud kini sa Iyang Pulong; sumala sa Iyang takna ug sa Iyang panahon.

Ug kinahanglan kini igahatag sumala, pinaagi sa maong tawo nga Iyang gipili sa pagbuhat niini.

¹¹⁵ Dili ko igsapayan kung pila pa ka mga halangdon. Anaa si Haring David, sama kagamhanan sa bisan kinsa kanila. Siya mao ang hari sa tibuok nasud. Apan adunay Iyang pamaagi sa pagbuhat niini, ug Iyang giingnan sila kon unsaon Niya pagbuhat niini. Apan napakyas sila sa pagbuhat niini.

¹¹⁶ Kinahanglan nga pinasikad kini sa Iyang Pulong; sumala sa Iyang takna, sumala sa Iyang programa.

¹¹⁷ Ug kini gikinahanglan pinaagi sa Iyang gipiling tawo aron hatagan niini ug aron sa pagbuhat niini. Misulay si Moises sa pagpahilayo gikan niini, “Pagpili ug ubang tawo.” Apan gipili sa Dios si Moises sa pagbuhat niini. Daghan kanila; si Pablo misulay sa paglikay gikan niini; daghan pang uban. Apan kinahanglan pinaagi kini sa usa nga Iyang ginapili sa pagbuhat niini.

Ug kinahanglan moabut kini, una, ngadto sa Iyang mga propeta. Ang Pulong sa Dios kinahanglan moabut ngadto sa Iyang mga propeta. Amos 3:7, “Ang Ginoong Dios dili magbuhat sa bisan unsa hangtud Iyang ginapadayag Kini una sa iyang alagad ang propeta.” Upat.

¹¹⁸ Ug ang propeta kinahanglan gipanghimatud-an pinaagi sa Pulong sa Dios.

¹¹⁹ Anaa na ang inyong lima ka mga kinahanglanon. Kinahanglan sa ingon nianang paagiha. Sa Iyang takna, Iyang panahon, kung kanus-a kini Niya giingon mamahimo nga mahitabo; ug ang tawo nga Iyang gipili; ug kini kinahanglan magaabot ngadto sa propeta; ug ang maong propeta kinahanglan nga usa ka gipanghimatud-ang propeta. Atong makita, daghan kanila diha sa Biblia, miabot kini sa mga propeta ug wala kini gipanghimatud-an. Ang atong propeta mao si Jesus Cristo.

¹²⁰ Busa karon himatikdi, kita n’yo, wala gipadayag sa Dios ang maong butang ngadto kanila pinaagi sa Iyang giandam nga pamaagi sa pagbuhat niini. Ilang gidawat ang kang David nga pamaagi. Ilang gidawat ang pamaagi sa mga sacerdote. Ilang gidawat ang pamaagi sa mga escriba, ang iya sa mga teologo, apan dili ang pamaagi sa Dios. Si Nathan-ael, maoy, siya mao ang propeta niadtong adlaw. Sa kadugayan, gisultihan sila ni Nathan-ael kung unsaon pagbuhat niini. Apan, kita n’yo, ilang gibuhad kadto nga walay pagkonsulta kang Nathan-ael. Walay usa ka pulong nga nagaingon nga nakonsulta si Nathan-ael. Sa tanang maong panghaylo, ang maong dakung butang nagapadayon! Ug, sus, akong nahinumdom kadtong awit, “Tugoting, magpadayon nga . . .”

Tabangi ko, Ginoo, sa dihang nagadilaab ang kasingkasing,

Tugoti ko nga ipaubos ang akong garbo (aron mouban sa kadaghana kanila), motawag lamang sa Imong Ngalan;

Tudloi ko nga dili mosalig sa kung unsay
ginabuhat sa uban,
Maghulat lamang diha sa pag-ampo alang sa
tubag gikan Kanimo.

Kita n'yo, sa ingon nianang pamaagi kini. Ipakita kanako nga nagakahitabo kini diha sa hustong paagi, dayon gitohoan kini.

¹²¹ Karon, gipadayag sa Dios kanila ang maong butang pinaagi kang David, ug pinaagi sa mga ministro, ug pinaagi sa katawhan, ug pinaagi sa mga capitan sa mga linibo, ug mga capitan sa mga ginatus, apan dili pinaagi kang Nathan-ael kinsa adunay MAO KINI ANG GINAINGON SA GINOO. Ug ang Ginoo miingon nga dili Siya mobuhat ug bisan unsa hangtud nga Iyang gipakita sa propeta sa maong panahon, una, kung unsay pagabuhaton. Nakita ba ninyo kung unsay ilang gibuhat? Mipadayon sila nga gawas sa Pulong sa Dios, miadto ug gibutang ang maong arka sa usa ka bag-ong caro. Kita n'yo? Busa miadto sila ug gibuhat kini nga gawas sa sugo sa Dios ug sa gikatagana nang pamaagi sa Dios.

Ug mao kana ang nahitabo karon, mga higala. Mao kana kon nganong nagkaaduna kita'y dagkung mga krusada, ug uban pa, ug walay mga resulta. Nagdugang pa ang pagpanapaw, nagdugang pa ang sala, nagdugang pa... Sultihan ko kamo, kining maong nasud wala na; dili lamang kini nga nasud, apan ang lain pang mga nasud. Kining maong nasud, sama sa England sa maong laing panahon, kaniadto pa nahimo nang bigaon kaysa tanan pang mga nasud.

¹²² Didto sa halayong Mozambique, upat ka gatus ug kawaloan ka milyas gikan sa sibilisasyon, didto sa lasang, ang mga batang beatnik nagapaminaw kang Elvis Presley, nagayango-yango sa ilang ulo ug nagalukso-lukso nga sama niana, sa tibuok gabii, nga may banting... O, sa gamay'ng butang sama niana nga moganoy sa usa ka libo ka milyas, ngadto sa Rhodesia, aron madungog si Elvis Presley. Ug bisan pa niana ilang ginaingon, "Relihiyoso siya kaayo, siya ug si Pat Boone, ug sila." Aba, kini ang Judas sa maong panahon, ug wala hisayri kini. Mao kana ang dautang bahin, nagatoo sila nga sila—sila husto.

Dili ba giingnan ni Jesus kining Panahon sa Iglesia sa Laodicea, "Ikaw hubo, makalolooy, alaut, buta, ug walay kasayoran niini"? Walay kasayoran niini!

¹²³ Bueno, ang mga batang Pentecostal didto sa Africa ug sa palibot, nagaingon, "Bueno, si Elvis Presley, siya ang nagaawit sa pinakanindot nga inyo sukad madunggan." Sa walay duhaduha kondili mao gayud ang gibuhat ni David, usab; sa walay duhaduha mao gayud ang gibuhat sa mga mag-aawit, apan nahimong hinungdan kini sa kamatayon nga hampakon

ang campo. Nakita ninyo kung diin na sila, kung hain na kita karon, mga higala?

¹²⁴ “Sa mga abaga sa mga Levita,” mao ang orihinal nga paagi sa Dios sa pagbuhat niini. Ug ila kining gibutang sa ibabaw sa bag-ong caro. Karon, dili gayud kini magpulos. Wala nila gikonsulta ang hustong pamaagi. Kita n’yo? Busa nahigawas sila, bahin niini, ug gihimo nila kini sa sayup nga pamaagi.

¹²⁵ Ug mao kana kon unsa ang nahitabo karon. Sa diha ang mga tawo, bisan pa kon unsa pa ka matinud-anon, mosulay sa pagbuhat alang Kaniya ug usa ka bulohaton nga supak sa Iyang gikataganang paagi sa pagpadayag niini, sa kanunay ilang malahugay kini. Ginapahimutang na kini sa Dios sa Iyang pamaagi. Ang tawo, bisan pa kon unsa ka matinud-anon, sulayan mong buhaton kini gawas niana, imo—imong maguba kini.

¹²⁶ Butang nga sama kanhi kang Balaam, sa adlaw ni Balaam. Giingnan sa Dios si Balaam, kadtong propetaha. Usa siya ka propeta, ang propetang si Balaam. Usa siya ka propeta, ug ang Pulong midangat kaniya sa tukma, nag-ingon, “Ayaw paglugsong didto. Mao kana ang Akong gipili. Mao kana ang Akong pinili.”

Ug nakig-uban si Balaam sa mga halangdon, sa mga tawo sa kasundalohan, mga magwawali, mga tawong may kagahum, ug miingon, “Bueno, akong—akong isulti kaninyo, ang hari maga...”

Kita n’yo, nahimong sulundan uban ni David, ang sulundan sa karon. Tan-awa gayud ang tanan diha sa usa ka pagtipo, ug inyo kining makita. Nakita ba ninyo kini? Moingon, “Amen.” [Ang kongregasyon nagaingon, “Amen.”—Ed.] Kita n’yo, kita n’yo, susama ra kini karon.

¹²⁷ Apan ang mga klerigo miingon, ang—ang—ang mga pari miingon, ang mga escriba miingon, ang mga teologo miingon, “Mao kini ang paagi nga kini pagabuhaton.” Apan, dili kini mao, ug gipamatud-an nga dili kini mao.

¹²⁸ Ug giingnan sa Dios si Balaam, ug usa siya ka propeta, una, gisultihan Niya siya, “Ayaw pag-adto.”

¹²⁹ Apan ang paghaylo niining ubang mga kalalaken-an maoy nahimong hinungdan kaniya sa pagbuhat niini nga supak sa kon unsay giingon sa Dios sa pagbuhat niini, ug nahimo kining tunglo imbis nga rebaybal. Oh, tinuod, miadto siya didto ug nagtudlo sa katawhan, nag-ingon, “Karon paghulat! Nasayod ba kamo’g unsa?” Miingon, “Kami—kami mga Moabitanhon. Nakahinumdom kamo, ang anak nga babaye ni Lot maoy among rayna. Siya maoy among kagikan. Usa lang kitang tanan ka dugo. Kitang tanan...Mao ra kitang tanan nga mga denominasyon.” Ayaw gayud pagpakigsagol

uban nianang maong butang. Pahilayo gikan niana. Kita n'yo? Busa miingon siya, “Kitang tanan managsama ra. Aba, ang inyong katawhan sama ra sa akong katawhan. Mahimo nato ang pagpakigminyoay, ang usa tali sa lain, aron magkaaduna kita’y tinuoray ng ekumikal nga konseho. Kita n'yo? Mahimo nato ang pagpanaghiusa sa tanan ug mobalik ngadto pag-usab sa maong orihinal nga butang.”

Gitunglo sa Dios ang maong butang. Niadtong maong sala wala gayud gipasaylo ang Israel. Nagpabilin kini kanila sa tanan nilang mga adlaw. Wala gayud kini gipasaylo. Nangamatay sila sa kamingawan uban niini. Husto kana. Tungod kay wala nila dawata ang gikataganang pamaagi sa Dios pinaagi sa Iyang gipanghimatud-ang pamaagi sa pagbuhat niini.

¹³⁰ Himatikdi, kining butanga nga ilang gibuhat nahimong hinungdan sa Israel aron mamatay sa maong kamatayon, didto sa kamingawan. Ug si Jesus miingon, “Ang matag usa kanila nangalaglag ug nangahanaw.” Bantayi kung kinsa kadtong mibarog uban kang Moises kaniadto, si Josue ug si Caleb, diha sa—diha sa maong programa.

¹³¹ Himatikdi pag-usab, ania si David, kon unsay iyang nabuhat. Ug sa gibuhat na niya, unsay gihimo niini? Nahimong hinungdan kini sa kamatayon sa paghampak sa usa ka tawong matinud-anon.

Karon, siguro nakakonekta pa kita sa gihapon, ug gusto kong maminaw kamong anaa latas sa nasud.

Kining butang nga nabuhat ni David, nga walay pagkonsulta kang Nathan-ael ug sa paghibalo sa Pulong sa Ginoo alang niini, nahimong hinungdan kini sa kamatayon sa paghampak sa matinud-anong mga tawo. Oo, sir. Iyang gituyhad ang iyang kamot, kang kinsa buhi pa diha sa atubangan sa arka; gikan kini sa iyang—iyang balay. Ug ang baka nahidugmo, ug ang arka nahulog.

¹³² Nabuhat na nila ang usa ka butang nga sayup, duha ka mga sayup nga butang. Ang una, wala gayud nila gikonsulta si Nathan-ael. Ang sunod nga butang nga ilang gibuhat, miadto sila didto nga walay pagkonsulta sa Pulong sa Dios. Kinsay, ang . . . Si Samuel mao ang Pulong niadtong adlaw . . . Ug wala gayud niya gikonsulta ang Pulong sa Ginoo. Dayon, sa pagbuhat nila, ilang nasupak ang Pulong sa Dios.

Ug ania kining maayong tawo, nga sukad pa mao ang tigtagad, usa siya ka obispo, nagdahum, “Bueno, dinhi, dili ko gustong maparkas ko ang Dios,” busa nagunitan niya sa iyang kamot ang arka. Diin, dili siya usa ka Levita, ug namatay siya. Tulo ka mga butang!

¹³³ Karon hunahunaa gayud pag-ayo, ug bantayi kon unsay nabuhat sa mga denominasyon karon. Kita n'yo, ila Kining

gisalikway, gitawag Kini “mini nga doktrina.” Kita n’yo? Tan-awa kung hain na sila. Ila nang maangkon ang ilang konsehong ekumenikal, maayo. Gitawag Kini nga “salabutanong telepatiya,” sa dihang ang Dios Mismo maoy nagapanghimatuod Niini nga maoy Kamatuoran, ug nagapamatuod Niini nga mao ang Kamatuoran. “Oh, gamay ra silang pundok nga mga kulangkulang diha,” nagaingon sila, “walay mga hibangkaagan kung unsay ilang ginapanulti.”

Husto kana, wala kaming hibangkaagan. Apan ginasulti lang namo ang Iyang mga Pulong, ug nahibalo Siya kung unsay Iyang ginasulti, kita n’yo. Dili ko Kini maisaysay, walay si bisan kinsa ang makahimo, apan Iyang—Iyang—Iyang ginapamatuod-an Kini.

¹³⁴ Karon himatikdi. Daghan sa mga matinud-anong magtotoo karon, nga nagaduol kang Cristo, buot moduol sa tibuok niyang kasingkasing, napatay sa espirituhanon sa samang paagi. Daghan ang matinud-anong tawo ang nagaadto sa Katolikong iglesia ug gustong mahimong usa ka Cristohanon, nagaadto sa Methodist, sa Baptist, sa iglesia ni Cristo, ug bisan pa sa mga Pentecostal, kita n’yo, ug gustong mahimong usa ka Cristohanon, dawaton sa iyang kamot kini, magpahisakop kanila.

¹³⁵ Ug sa dihang nakita ni David kining butang nga nagakahitabo, nakapahigmata kini kaniya. Ayaw pagpaulahi sa pagmata diha, igsoon. Nakita niya ang kamatayon nga mihampak.

Ipakita kanako ang mga resulta. Ngano kining ginaingon nga rebaybal, nga nagapahibalik sa katawhan sa mga kasimbahanan, ang nabuhat ngadto sa nasud, ngadto sa—ngadto sa kahugpungan sa mga magtotoo? Wala gayud kini kondili nagbuhat lang ug bag-ong mga organisasyon ug mga denominasyon, kadtong tanan, sa pagpadaghan ug mga sakop ug uban pa. Nahimo bang mas maayo na ang nasud? Nag-ingon sila nga himoon nilang. . .

¹³⁶ “America. Ang Dios magapanalangin sa America. Kini ang—kini ang nasud, usa kini ka Cristohanong nasud.”

Usa ka milyon ka milyas kini gikan sa usa ka pagka-Cristohanong nasud. Wala man gani ako nagaampo alang niini. Unsaon ko man sa pag-ampo niini, ug dili man kini maghinolsol ilalum sa dagkung mga gahum sa Dios nga gipakita sa atubangan niini; ug ginapanghimakak, ug ginasira ang mga pultahan alang Niini, ug nagapahilayo? Akong ginatugyan kini ngadto sa Dios. Ug siya magapadayon sa pagpahilayo pa. Ug karon magaunlod siya. Bantayi lang kung unsay mahinabo.

¹³⁷ Daghang matinud-anong tawo nagapahisakop sa usa ka organisasyon, o sa usa ka pundok, o matang sa usa ka kulto, ug diha sila mangamatay, sa espirituhanon. Dili mo mahimo

ang pagsulti kanila sa bisan unsa. Nakuha na nilang mahitanum kanang butanga diha kanila, “Aba, kining mga obispo nag-ingon niini. Ug *kini* miingon niini, *kini* miingon niini.” Ipakita mo kanila dinhi mismo sa Pulong sa Dios diin kini MAO KINI ANG GINAINGON SA GINOO. “Apan ang among pastor. . .”

Dili mahinungdanon kanako kon unsa may ginaingon sa inyong pastor, dili igsapayan kon unsa may akong ginaingon, o ginaingon ni bisan kinsa pa man. Kung kini supak sa gipanghimatud-an nga Pulong sa Dios, sa maong takna, sa maong panahon, sa maong Mensahe, ug uban pa, hikalimti kini. Pahilayo gikan niini. Ug kinahanglan kong motindog sa atubangan sa matag usa kaninyo sa Adlaw sa Paghukom, ug nahibalo kamo niana. Ug diyutay ang akong igasulti niana, maingon nga tiguwang na ako karon. Ako. . .Dili ingon kay nasayod ako sa butang, apan Siya ang nahibalo. Ginasunod ko lang kon unsay Iyang giingon.

¹³⁸ Tan-awa karon diha ang dagkung mga krusada nga nagkaaduna kita sa tibuok nasud. Kini napamatud-an na sukad nga kini kakawangan. Ug dili ba nagaingon si Jesus karon dinhi, sa Lucas 7:7, “Kawang lamang ang ilang pagsimba Kanako”? Kawang lamang ang pagdala ni David sa arka. Kawang lamang ang pagbansay ni Ahab niadtong mga propeta. Kawang lamang ang pagdawat ni Balaam niadtong salapi. “Tungod kay gipaka-Doctrina ang mga kasugoan nga hinimo’g tawo.” Ang mga kasugoan sa Dios maoy mahinungdanon, bisag unsa pa ka ma- . . .

¹³⁹ “Kadtong mga tawhana matinud-anon gayud.” Inyo gyud kanang nagakadunggan, “Hilabihan ang ilang pagkamatinud-anon.” Wala kadto’y bili. Mga Saksi ni Jehova, mga Sabadista, ug kadtong tanang mga kulto, managpanggula diha sa kadalanan ug managbuhat ug mga butang nga wala’y usa kanato ang mobuhat niini. Ang mga Katoliko motindog diha sa kanto ug magapakilimos, ug uban pa, kanang mga mando nga sama niana, ug motumbas sa binilyon ka pilo binilyon ka pilo binilyon ka mga dolyares, sa gihapon nagapakilimos pa alang niini. Mga matinud-anon, sa walay pagduhaduha. Ang mga kaiglesiahanan nagapangadto ug—ug mangsangyaw, ug uban pa, ug mga ministro motindog sa pulpito ug buhaton ang tanan kutob sa ilang mahimo aron pagkabig pa ug bag-ong mga sakop pasulod sa ilang simbahan; apan mao kini ang bag-ong arka.

Adunay usa lamang ka Arka nga pagasundon, kana mao, ang Pulong sa Dios. Ang bisan unsang butang nga kasupak nianang maong Arka, pagpahilayo gikan niini! Anaa kini diha sa bag-ong caro, ug wala diha sa ibabaw sa mga abaga sa Dios. Husto. Pahilayo gikan sa maong butang. Ayaw gayud pagpanghilabot niini.

¹⁴⁰ Sa atong dagkung mga krusada, binilyon ug minilyon ang mga nangumpisal. Ug duda ko kung aduna bay usa ka gatus kanila, sa tanan niini. Kita n'yo, wala pay maong butang.

Unya tan-awa ang saad nga Pulong.

¹⁴¹ Maghunahuna ka nga kana napakyas, ug nahibalo kita nga kini napakyas. Ang pipila sa atong pinakabantugan nga—nga mga rebaybalista karon sa nasud nagaingon nga napakyas kini pag-ayo. Ang kaiglesiahan nahibalo nga kini napakyas. Ang matag usa nasayod nga kini napakyas. Bueno, ngano man kini? Nganong napakyas man kini?

Kini alang sa maayong katuyoan. Kadto aron sa pagdala sa katawhan sa Presensiya sa Dios, sa dagkung mga krusada. Ug minilyon ka katawhan ang migasto sa ilang salapi, ug gigahin diha sa dagkung mga krusada. Ug ang mga kaiglesiahanan tanan nanagkaduyog, dagkung mga awditoryum, ug dagkung mga butang, ug dagkung mga butang nga nanghitabo. Nganong napakyas man kini? Tungod kay wala gayud sila nasayod sa maong takna nga ilang ginakabuhian.

Dili ikahibulong nga mitindog si Jesus, ug sa sulod sa Iyang kasingkasing Siya mihilak. Mga luha nanaligid sa Iyang mga aping, ug matud Niya, “Jerusalem, O Jerusalem, sa makadaghan gipangandoy Ko ang pagtigum unta kanimo maingon sa usa ka himungaan nga motigum sa iyang mga piso. Imong gibato ang matag propeta nga Akong sinugo diha kanimo. Kondili modumili ka. Apan karon ang imong takna miabot na.”

¹⁴² Wala ba ninyo mabati ang Espiritu Santo nga nagatiyabaw gikan sa sulod ninyo? “Oh, Estados Unidos ug kalibutan, makapila Kong gipangandoy sa pagtigum unta kaninyo, apan modumili kamo. Karon ang inyong takna nahiabot na. Ang inyong dios sa kahilayan, ang inyong dios sa kahugawan, ang inyong dios nga Sodoma ug Gomorra, nahiabot na sa inyong taliwala.” Bisan ang atong gagmay'ng mga bata, mga pang-beatle na nga mga alut ug mga bangs nga sa ila nang tibuok nawong, ug nagasugod na nga mga gagmay'ng hiwi. Ang atong mga kababayan-an wala na. Lagpas na sa katubsan-an. Ang atong kalalaken-an nangahimo nang dagkung mga bayot, nagasuroy diha sa gagmay'ng, gisul-ob nga mga purol, ug nagapanglihok nga daw usa ka babaye, ug mga buhok nga nagadunghay ngadto sa ilang mga liog. Ug kita mga Sodomanhon na, ug ang maong kalayo ug kapungot sa Dios nagahulat na kanato.

¹⁴³ Nasayod ba kamo kung unsaon Niya sa pagpatay, kung unsaon Niya sa paglaglag niini? Sa maong pamaagi nga kanunay Niyang gibuhat. Sa dihang ang usa ka bigaon nagbuhat ug bisan unsang sayup, siya gibato ngadto sa kamatayon; nagpunit sila'g mga bato aron patyon ang maong babaye nga bigaon. Mao kana kon unsaon Niya sa pagpatay ang iglesia. Ang Biblia nag-ingon,

nga magpaulan Siya ug mga bato nga yelo gikan sa kalangitan, nga motimbang ug usa ka gatus ka libras ang matag usa, ug Iyang batohon sila. Kinsa may mopahunong Kaniya? Unsang siyensya ang moingon nga dili kini mahimo? Buhaton kini Niya.

Sama sa dihang Siya nagbuhat ug arka ug gipalutaw si Noe ngadto sa kasigurohan, buhaton Niya kini pag-usab alang sa Iyang Iglesia.

Ug pinaagi sa Iyang Kaugalingong mga balaod ug sa Iyang Kaugalingong pamaagi, Iyang pagabatohon kanang maong bigaon nga nakighilawas uban sa mga hari ug mga capitan sa mga ginatus ug mga linibo. Batohon Niya siya ngadto sa kamatayon, pinaagi sa Iyang Kaugalingong kabalaoran nga Iyang gipahimutang. Kinsa may moingon Kaniya nga dili Siya makahimo ug ulan nga yelo?

¹⁴⁴ Pangutana kang bisan kinsa nga nahibalo sa kung unsaon man sa pagsugod sa ulan. Ug nagatuyok kini, ug nagabalik kini pinaagi sa turbo; ug mosamut ug modaghan ug modaghan ug modaghan pa, hangtud nga maangkon niini ang igong gibug-aton, ug dayon mangahulog kini.

Siya, ang Dios, Kinsay... ang butad dili gani makapugong Kaniya sa yuta, ug mikayab Siya ngadto sa Langit. Ang Dios, Kinsa maoy nagbuhat sa kabutaran, makahimo usab sa pagbuhat ug turbo sa igong kadakuon sa pagtabyog sa bato hangtud nga motimbang kini ug usa ka gatus ka libras. Nag-ingon Siya nga buhaton Niya kini, ug buhaton gayud Niya kini. Kinsa may moingon Kaniya nga dili buhaton kini? Buhaton Niya kini, tungod kay Siya nag-ingon nga buhaton Niya.

¹⁴⁵ Ania na kita sa katapusang mga adlaw. Nagatindog kita nga haduol na sa hukmanan. Ngano man? Nagapaninguha sila sa pagkaon sa karaang manna nga kanhing nangahulog mga kalim-an na ka tuig ang milabay, ang iglesiang Pentecostal. Ang Holiness nga iglesia nagasulay usab, sa kapin duha na ka gatus ka tuig ang milabay. Ang mga Lutheran, sa mga tulo na ka gatus, o kapin pa, ka mga tuig ang milabay, daghang gatusan na ka mga tuig nga milabay. Nagapaninguha sila sa pagkaon sa karaang manna. Oh, igsoon, kanang pagkaona lang-og na. Mahugaw na kini. Kini maga... Aduna na kini—aduna na kini... Aba, kanunay ko nang giingon, aduna nay mga wayawaya niini, mga ulod sa langaw. Mopatay kini kanimo, sa pagkaon niini.

¹⁴⁶ Susiha kon si David o ang bisan kinsa pang uban kanila nangutana pa unta sa Tinapay niadtong maong panahon.

Kon ang mga pari, ug mga propeta, ug mga magwawali, ug mga teologo, ug ang mga tulungaan, ug mga denominasyon, nangonsulta pa unta mahitungod sa maong panahon! Apan karon dili na kini magpulos kanila. Kini human nang migawas. Dili na kini makatabang bisa'g diyutay. Tapus na siya karon.

Milabang na siya nianang maong utlanan sa mga lima na ka tuig ang milabay, tali sa paghinolsol, sa paghukom ug kalooy.

¹⁴⁷ Himatikdi, unsa man unya? Unsa may mahimo? Unsa pay angay'ng buhaton? Atong pangutan-on ang propeta, ang Biblia, diin dili kita makahimo sa pagdugang o pagtaktak gikan Niini. Kung buhaton man nato, pagataktakon kita sa Dios gikan sa maong Basahon sa Kinabuhi.

Ang Biblia nag-ingon, sa Malaquias 4, kon unsa may mahitabo karon. Ang Pinadayag 10, kon unsa nga pagaablihan ang Pito ka mga Timri ug ipadayag kining tanan nga mga tinago nga gililong sa niining mga repormador! Iyang giingon kon unsaon niini pagbuhat. Anaa kini sa Biblia, ang MAO KINI ANG GINAINGON SA GINOO. Ang Dios sa bug-os, hingpit nga giila kana; ug gipanghimatud-an Kini nga maoy Kamatuoran, pinaagi'g mga ilhanan, mga katingalahan diha sa kalangitan, diha sa kawanangan, ug sa tanan na, sa sulod sa katloan ug tulo ka mga tuig.

Nagahunahuna ba kamo nga magpatalinghug sila Niini? Dili. Patay na sila. Ilang gihilabtan ang butang nga maoy nakapatay sa maong tibuok butang. Dili na, dili na kini mahimo; dili kini mahimo, dili na gayud.

¹⁴⁸ Mao kini sa dihang nahitabo kining maong butang, nga nakita ni David. O Dios, padad-i kami'g David nga makakita kung hain siya nagabarog, nga makahimo sa pagtan-aw ug makita ang Dios nga nagsaad sa kon unsa, kung unsaon Niya sa pagbuhat sa niining panahon. Giingon sa Dios kini dinhi mismo sa Iyang Pulong, kung unsaon kini Niya sa pagbuhat.

¹⁴⁹ Gisultihan sa Dios si Miquias. Gisusi ni Miquias ang iyang panan-awon sa atubangan sa upat ka gatus ka mga inilang mga propeta. Iyang gisusi ang iyang panan-awon aron tan-awon kung husto ba kadto. Gitan-aw niya pabalik sa kung unsay giingon sa propeta nga nauna kaniya, aron tan-awon kung unsay nahitabo. Gilantaw niya balik, ug iyang nakita si Elias nga nagatindog kaniadto, miingon, "Ahab, ang mga iro magatilap sa imong dugo, usab." Karon, nakita niya dayon nga kadtong panan-awon sumala gayud sa Pulong sa Dios, busa gisulti niya kini. Ug husto siya. Husto. Bisa'g unsa pay gisulti sa uban kanila, nagpabilin siya mismo nianang maong Pulong.

¹⁵⁰ Karon atong susihon ang panan-awon nga aduna kanato karon. Kini ba maoy pagpatindog ug mga kasimbahanan; mga bag-ong butang ba kini; mga dagku bang mga butang kini nga magakahitabo? O, paghukom na ba kini? Lantawa balik ug tan-awa ang maong saad bahin karon, tan-awa kung unsa na ang panahon karon nga ania kita.

¹⁵¹ Moingon ka, "Bueno, dalaygon ang Dios, igsoon, matinud-anon ako. Nagpasakop ako sa iglesia. Nabatonan ko ang akong kurso sa bachelors of art. Nakahimo ako *niini*." Maayo man kana,

maanindot kana, wala ako'y batok niini; Mao pud si David, mao pud ang mga pari niadtong adlaw, mao pud ang mga teologo. Apan supak kadto sa Pulong.

¹⁵² Ang Dios miingon kung unsaon kini Niya sa pagbuhat karon, kon unsaon Niya sa pagpasig-uli sa tanang mga butang, kon unsay Iyang pagabuhaton pag-usab. Nagsaad Siya sa pagpasig-uli. Husto kaayo kana. Diha sa Joel 2:28, Siya nagsaad nga Iyang ipasig-uli. "Akong ipasig-uli," nagaingon ang Ginoo, "ang tanang mga tuig nga gikaon sa lukton." Nakabaton sila'g usa ka di-... Kita n'yo, mao ra kana nga ulod; anaa kini sa nagkalainlaing ang-ang sa kinabuhi. Ug sa dihang nagsugod nang ginakaon sa Katolisismo, dayon ang Lutheran, ug ang Methodist, ug mga Pentecostal, ug ang tanan na, nga padayon; Siya miingon, "Akong ipasig-uli ang tanang butang balik ngadto sa Iglesia ang mao gayud sama niadtong usa sa unang kahimtang."

¹⁵³ Bantayi ang maong panan-awon sa miaging gabii. Tukma kaayo ang mao rang Pangasaw-onon nga miagi *niining* dapita, miagi *niining* dapita. Human niadto milabay na ang mga bigaon nga sul-ob ang ilang mga bisti, ang ilang daang mga butang *niining* paagiha, ug nagasayaw sa rock-and-roll, ug nagatawag sa ilang kaugalingon nga Iglesia.

Moingon kamo, "Buena, wala man namo ginabuhat kana."

Ingon niana ang pagtan-aw sa Dios kaninyo. Kini dili ingon sa kon unsa ang pagtan-aw ninyo sa inyong kaugalingon. Kini maoy ingon sa kon unsa ang pagtan-aw sa Dios kaninyo. Walay tawo nga nagatan-aw sa iyang kaugalingon nga sayup. Kung ikaw motan-aw sa salamin sa Pulong sa Dios, Kini nagatug-an kanimo kung sayup ka o dili. Kung gibuhat pa unta kana ni David, iya na untang nakita ang iyang sayup. Kung gibuhat pa kana unta ni Ahab, o silang mga propeta nagbuhat pa unta niana, ila na untang nakita ang ilang mga kaugalingon nga sayup.

¹⁵⁴ Matud sa usa ka gipanghimatud-ang propeta, "Mamatay si Ahab, ug ang mga iro magatilap sa iyang dugo." Ug ang iyang propesiya tukma gayud Niini. Mao nga iyang nasayran nga husto siya. Bisan pa si Josafat nakita unta kana ug nahibaloan kini. Sa pagkakita ni Miquias sa maong panan-awon, wala gayud siya gikauyonan sa mga tawo sa ilang mga adlaw, apan aduna siya'y MAO KINI ANG GINAINGON SA GINOO. Husto siya.

¹⁵⁵ Himatikdi, ato nang ginadala kining maong butang karon niining panahona, sa dihang atong makita na kining bililhong takna nga atong ginapadulngan.

Matikdi kung unsay ginatinguhaan ni David nga buhaton, usab. Ania'y akong gamay'ng sinulat dinhi bahin niana. Nanginguha siya sa pagdala sa maong arka ngadto sa siyudad ni David, sa iyang kaugalingong denominasyon.

¹⁵⁶ Tan-awa'g balik didto sa dihang unang misulti ang Ginoo dinhi sa suba, "Maingon nga si Juan Bautista gipadala aron pag-andam sa maong unang pag-abot. . ."

Igsoon, ang Assemblies dili mahimong tugotan kana, ni mahimong tugotan man sa United, silang tanan. Kinahanglan aduna gayu'y ilang usa kon asa man. Ah, kinahanglan ilang buhaton kini tanan, kita n'yo, tukma gayud. Ilang tanan gikinahanglan dalhon kini ngadto sa ilang kaugalingong panimalay.

¹⁵⁷ Gitinguhaan dalhon kini ngadto sa siyudad ni David. Ngano man? Wala may dapit nga naandam alang niini.

Ug mao kana ang hinungdan nga dili ninyo madala ang Mensahe ngadto sa usa ka denominasyon. Ang Pulong, ang Arka, si Cristo, "mao sa gihapon kagahapon, karon, ug hangtud sa kahangturan," ug ang tanan Niyang ilhanan, dili ninyo Kini mahimong dad-on ngadto sa inyong organisasyon. Dili gayud sila motoo Niini, tungod kay walay luna alang Niini. Dili ba nagaingon ang Biblia nga anaa Siya sa gawas sa iglesia sa panahon sa Laodicea, nagapaninguha sa pagsulod?

Walay dapit didto sa siyudad ni David, bisan pa kung unsa ka matinud-anon niini, ug unsa ka bantugan niini, ug—ug uban pa. Sa gihapon dili kadto ang maong dapit. Kinahanglan didto kini sa Jerusalem. Sa kaulahian mao kana ang giadtoan niini, sa dihang giingnan sila sa propeta kung unsay kinahanglan buhaton niini. Kita n'yo? Sa ingon kinahanglan nga dad-on kini ni David ngadto sa iyang kaugalingong siyudad. Walay dapit nga andam alang niini.

¹⁵⁸ Si Cristo mao ang atong Arka, ug dili sila modawat Niini. Si Cristo mao ang Pulong; dili sila modawat Niini. Gusto nila ang ilang kredo, ang ilang denominasyon, ang bag-ong arka, o—o ang bag-ong tigdala. Gusto nila nga ang denominasyon maoy modala Niini; usa ka bag-ong arka. Huh!

Hinumdumi, si Cristo ang atong Arka! Nagatoo ba kamo nga si Cristo ang Pulong? [Ang kongregasyon nagaingon, "Amen."—Ed.] Kana mao ang Arka, kon ingon-ana. Husto ba kana? Sige. Dili mahimong dad-on si Cristo, ngadto sa iyang hangtong pwesto, pinaagi'g bisan unsa nga pang-denominasyong caro. Siya nagapakigsabot sa usa ka tawo, ug dili uban sa usa ka pundok. Bisin kanus-a wala gayud Siya nagpakigsabot sa usa ka pundok; sa usa gayud ka tawo. Sa dihang, miingon Siyang dili Siya. Kung gibuhay pa Niya, Iyang gisupak ang Iyang Pulong, ang Amos 3:7. Dili nimo mahimo Kining bakak. Dili, sir. Kamatuoran Kini.

¹⁵⁹ Apan, kita n'yo, ilang ginapaninguhaan. Ang Arka dili mahimong dad-on pinaagi sa organisasyon. Kadaghan ang mga ulo diha niini. Kita n'yo? Dili kini mahimo. Nagsaad Siya nga dili kini Niya pagabuhaton, ug dili Siya mobuhay niini. Siya

miingon... sa dihang Iyang gisaad—sa dihang Iyang gisaad nga kini pagabuhaton sa laing paagi? Mao kana ang hinungdan nga Siya misaad nga dili Niya kini buhaton.

Ayaw'g tagda silang mga panghunahuna. Mabati ko kini. Kita n'yo?

¹⁶⁰ Busa Iyang—Iyang gisaad nga Iyang buhaton kini sa usa ka siguradong paagi, ug ang bisan unsang butang nga sukwahian niana dili Niya kini buhaton. Kita n'yo? Kondili pinaagi sa Iyang orihinal nga pamaagi, sumala sa kon unsay Iyang giingon diha sa Amos 3:7, sa nianang paagi Niya kini buhaton. Ug kana kinahanglan nga gipaluyohan ug gipamatud-an nga maoy husto.

Karon, nahibalo na kamo kung unsay Iyang gisaad niining panahon, unya Iya na kining ginabuhat karon. Mao gayud kana ang kung unsay Iyang giingon nga Iyang buhaton. Iyang ablihan kadtong Pito ka mga Timri, ug kon unsa pang tanan nga Iyang buhaton; ipadayag ang kaniadtong mga tinago, kon naunsa kining mga pagbautismo ug ang tanan pang butang nga nakapalibog. Ug ania na kini, diha sa Iyang Presensiya mismo. Ginapamatud-an kini sa siyensya. Ang kalangitan nagmantala niini. Ang tawo nagatindog, nga nagalantaw mismo diha niini, ug makitang nagakahitabo kini. Walay usa ka butang nga Iyang giingon gawas sa kon unsa ang Iyang gipanghimatuod. Tan-awa. Aron lang nga inyong makita kung hain na kita karon.

¹⁶¹ Kon unsa nga ang si bisan kinsang tawo nga anaay Iyang Espiritu, nakaila niini; nga adunay Espiritu sa Dios diha kaniya, nahibalo nga Kini mao ang Kamatuoran, tungod kay ang Espiritu sa Dios dili mosulti nga supak sa Pulong. Dili, dili. Moanaa kini mismo sa Pulong.

Moingon ka, “Nadawat ko man ang Espiritu Santo. Nakasinggit ako; nakasulti ako'g mga dila. Nakasayaw ako diha sa Espiritu.” Wala kanay kahulogan alang nagdoto sa Dios. Kita n'yo?

Ingon man usab ang gibuhati ni David, sa tinuod mao rang butanga, sa kaniadto. Nanag-awit sila sa tibuok niyang kusog, ug misinggit siya diha sa tanan niyang kusog. Tanan nang uban kanila nanagbuhati sa ingon, ug nagabaktas sila mismo kaniadto padulong sa kamatayan. Husto kana. Wala kanay bisan unsang kalambigitan diha niini.

¹⁶² Ang Pulong mao ang mahinungdanon, ang Pulong sa Ginoo. “Sila nga nagahulati diha sa Ginoo.” Oo, sir. Kita n'yo, sila nga adunay Espiritu sa Dios diha kanila, nagatan-aw sa maong saad alang niining adlaw, ug nagabantay ug nagapaabot hangtud nga makita nila Kini. Dayon sila moingon, “Mao na Kini.” Ginapadayag Kini sa Dios diha kanila.

¹⁶³ Sama kang Nathanael. Miadto si Felipe ug nakita si Nathanael. Miingon si Nathanael, “Karon kadiyut lang. Nasayod

ko nga gisaad kana, apan tugoti kong makita Kini.” Ug sa nakita na niya Kini, miingon siya, “Mao na Kini.”

Ang babaye miingon, “Karon, nahibalo na ako, ako nang nadungog ang tanang matang sa mga teologo. Ako nang nabuhat *kini* ug *kana*. Ug nabasa ko na ang Biblia, sa akong kaugalingon, ug nahibalo ako nga atong. . . Adunay nagasingabot nga Mesias, nga magabuhat Niining mga butanga, busa Ikaw mao tingali gayud ang Iyang propeta.”

Siya miingon, “Ako mao Siya.”

¹⁶⁴ Ang babae miingon, “Dali, tan-awa ang usa ka Tawo, mao na Kini.” Nagpaabot siya hangtud nga iyang nakita nianang Mesias nga gipaila pinaagi sa Pulong sa Dios, dayon siya miingon, “Mao na kana ang atong gipaabot, sa upat na ka gatus ka katuigan. Wala gayud kita’y propeta o unsa man. Ania na Siya karon, ug Siya na Mismo ang miingon nga Siya’y mao Siya.” [Blangko nga bahin sa teyp—Ed.] “. . .sa gawas didto ug tan-awa ang usa ka Tawo si Kinsa misulti kanako sa mga butang nga akong nabuhat.”

Apan ang mga sacerdote naninguhang patyon Siya, ug sa katapusan nahimo gyud nila kini. Kita n’yo?

Apan dili nila mahimong patyon ang Iyang Espiritu karon. Husto kana. Dili, dili Kini nila mapatay. Ania Kini dinhi aron dad-on ta pasulod, busa mapasalamaton kita. Himatikdi kung unsa kagamhanan ang Dios, kon unsa ka daku ang Iyang mga buhat, kon unsa nga kini wala gayud pagkapakyas!

¹⁶⁵ Karon, ang Dios adunay usa ka giandam na ug orihinal nga pamaagi sa pagbuhat sa mga butang, ug dili gayud kini Niya buhaton nga supak niana.

¹⁶⁶ Karon Iyang gisaad sa katapusang mga adlaw nga kana mao kon unsay Iyang pagabuhaton. Ug gipadala Kini kanila, kanato ang Mensahe; ug kining maong Mensahe magkaadunay mao rang ilhanan sama kadto kang Elias, sama kadtung aduna kang Eliseo, sama kadtung aduna kang Juan Bautista. Ug pabalikon Niini ang mga kasingkasing sa maong katawhan, dili ngadto sa denominasyon, kondili pahibalik ngadto sa orihinal, apostolikanhong mga amahan, pabalik ngadto sa Pulong. Kon giunsa nga kining mga butanga napanghimatud-an na. Kon giunsa nga diha sa pagtingog na sa maong katapusang manulonda, sa Pinadayag 10, “Sa mga adlaw sa ika-pitong manulonda, kining tanan nga mga tinago nga kaniadto. . .”

“Nganong gibuhath man *kini* sa Methodist, ug sa Baptist, ug sa iglesia ni Cristo, ug sa Saksi ni Jehova, ang tanan nagabuhat *niana*?”

“Silang mga tinago igapadayag sa katapusang adlaw, sa diha ang iya sa pito ka mga manulonda. . . ang Mensahe sa ika-pitong manulonda, sa dihang iyang. . .” Dili sa dihang nagasugod

na siya sa pagbuhat niini, kondili, “Sa dihang nagasugod na siya sa pagtingog sa iyang Mensahe.” Kita n’yo? Dili sa mga katuigan nga pagpangandam, kondili, “Sa dihang nagasugod na siya sa pagtingog sa maong Mensahe, kining mga tinago dayon mahipadayag na.” Ug ania sila; nga wala nahisayran sila, ug kamong mga tawo maoy saksi niana.

¹⁶⁷ Ug unya didto niadtong dakung obserbatoryo, aron ang kalibutan walay ikapangulipas, sa gihapon sila nagakatingala kung unsa may nahitabo. Sa Tucson, silang dagkung mga obserbatoryo nakakuha ug hulagway niini didto sa itaas; sa gihapon nahibulong pa kon unsay nahitabo. Unsa man kini? Sa gihapon gimantala pa kini nila sa pamantalaan, “Aduna bay nasayod sa bisan unsang butang kung unsa, kon giunsa man niining pagkahitabo?” Walay gabon didto sa maong itaas, wala nay hangin, walay kaumog; katloan ka milyas ang gihabugon diha sa kahanginan. Oh, sus!

“Magkaadunay mga ilhanan sa itaas sa kalangitan. Ug sa dihang nagakahitabo na kining mga butanga, mga linog sa nagkalainlaing mga dapit, dayon magapakita ang maong ilhanan diha sa langit, sa maong Anak sa tawo.” “Kanang adlaw,” diha sa Lucas, “ang Anak sa tawo magapadayag pag-usab sa Iyang Kaugalingon; nga ginapadayag, ang Iyang Kaugalingon.” Ug ang kalibutan mahisama nang tan-awon sa Sodoma ug Gomorra. Oh, sus!

Mga kaigsoonan, ayaw pagpakaburong sa espirituhanong mga butang, kita n’yo. “Susiha ang mga Kasulatan, kay diha Kanila nagahunahuna kamo’g Walay Katapusan, nga aduna kamo’y Kinabuhing Walay Katapusan; ug mao Kana Sila ang nagapanghimatuod sa Pulong.” Kana Sila maoy nagapanghimatuod sa Kamatuoran, sa mga butang nga ginapamuhat sa Dios niining taknaa.

¹⁶⁸ Ug karon unsa na man? Sila nga adunay Espiritu sa Dios, nagapaabot niining mga butanga. Ug sa dihang makita na nila kanang mga butanga, ilang ginatoohan kanang mga butanga. Si Jesus miingon, “Walay makaari Kanako gawas kon pagadanihon siya sa Akong Amahan. Ug ang tanan nga gikahatag Kanako sa Amahan,” Siya mao ang Pulong, “moari sila Kanako. Moari sila Kanako.”

¹⁶⁹ Ingon ug madayganon ra kaayo ko niining buntaga, kita n’yo. Nagahulat sila sa Ginoo, nagapaabot; ug sa dihang sila nagapaabot, ug ilang makita kanang saad sa maong adlaw, nga ginapanghimatud-an, nagapabag-o kini sa ilang pagtoo sa Iyang Pulong. Tungod kay, Iyang gisaad nga buhaton kini, ug ania karon Iya nang ginabuhat kini. Dayon wala nay pagduhaduha. Nagasulti ang Dios. Ang Iyang Pulong, una gyud, nagasulti. Ug ang Espiritu nga nagadala Niini maoy nagabuhat sa butang nga giingon sa Pulong nga pagabuhaton Niini.

Oh, aduna kita'y daghang mga pagpanundog. Aduna pa sa gihapon kita'y daghan kanila, mga tawong matitud-anon ang kasingkasing nagapaninguha sa pagbuhat ug mga butang *niining* paagiha ug *nianang* paagiha, apan bantayi kung unsay nahitabo. Mga katawhan mopasilabot sa ilang kamot, ug unya— unya mangamatay. Kita n'yo, himatikdi.

¹⁷⁰ Walay tawhanong laraw nga denominasyon ang magpulos gayud, nagahimo'g mga sakop alang sa ilang kaugalingong binuhat nga mga pang-denominasyon nga arka. Ang Dios wala gayud nagkaaduna ug denominasyon. Bisan kanus-a dili gayud Siya magkaaduna ug usa ka denominasyon. Ug usa kini ka binuhat sa tawo nga butang.

¹⁷¹ Ug nahibulong ko, karon, kung kining atong pagpangabig ug dagkung mga krusada ug mga rebaybal, wala pa ba nato napuno ang arkang Methodist, ang arkang Baptist, ang arkang Presbyterian! Apan unsa na man ang Arka ni Cristo, ang Pulong?

Ug kon ang Pangasaw-onon mao ang mahimong Pulong, nan kinahanglan Siya'y iya ni Cristo, kabahin sa Pamanhonon. Siya kinahanglan mao gayud ang Pulong; ang Pulong nga dili alang sa Iyang adlaw; ang Pulong niining adlaw, nga Iyang gisaad nga mao niining adlaw, nga Iyang gipadala ang Iyang Pulong sa pag-umul sa Iyang Pangasaw-onon ug sa pag-andam Kaniya. Hinaut nga atong makita kini! Ayaw paghambin ug mga pangagpas sa imong kaugalingon karon, ug ayaw pagdawat kang bisan kinsa pang pangagpas. Dawata ang gipanghimatud-ang Pulong dinhi, ang Biblia. Kini ang nagaingon.

Ang Dios nagsaad diha sa Iyang Pulong kung unsaon Niya sa pagpili sa Iyang Pangasaw-onon niining katapusang adlaw. Nahibalo ba kamo niana? Iya kining gisaad, kon unsaon Niya sa pagbuhat niini, ug kana pinaagi sa Iyang orihinal nga laraw sa pagpili ni Cristo, sa pagpili sa mga takna, sa pagpili sa mga panahon, kon unsaon Niya . . . Dili kini Niya mapakyas, diha sa Iyang Pangasaw-onon, tungod kay kabahin Siya nianang maong Pulong.

Dili Niya mahimo ang pagpili Niini pinaagi sa usa ka denominasyon, kung wala Niya pilia si Cristo pinaagi sa usa ka denominasyon. Miabot ba si Cristo diha sa usa ka denominasyon? Miabot ba Siya pinaagi sa usa ka denominasyon? Wala. Ila Siyang gisalikway. Bueno, mao gayud kana ang gibuhat sa denominasyon kaniadto. Unya sa dihang Siya nagapili na sa Pangasaw-onon, mahimo ba Siyang moabot sa lain pang paagi?

Giunsa man Niya ang pagdala kang Cristo dinhi? Pinaagi sa Pulong sa mga propeta. Husto ba kana? Unsaon man Niya ang pagdala sa Iyang Pangasaw-onon dinhi? Pinaagi sa Pulong sa mga propeta.

Giunsa man Niya ang pagpaila Kaniya sa dihang miabot Siya? Pinaagi sa usa ka tawo nga anaa ang espiritu ni Elias kaniya, nga gikan sa kamingawan. Unsaon man Niya sa pagpaila sa Iyang Pangasaw-onon? Iyang gisaad sa Malaquias 4 ang samang butang, sa dili pa Niya malaglag ang yuta, sama sa nahitabo sa mga adlaw sa Sodoma.

¹⁷² Hinumdumi, gisunog ang Sodoma. Husto ba kana? Bueno, kining kalibutana pagasunogon. Mao ang giingon ni Jesus. Ug kini mamahimong mao na ang takna, nga, sama sa Lucas sa ika-17 nga kapitulo ug sa ika-30 nga bersikulo nag-ingon, “Sa maong mga adlaw nga mahisama kini sa Sodoma ug Gomorra, nan ang Anak sa tawo igapadayag na.”

Ug dayon unsay mahitabo? Sumala kang Malaquias, Iyang sunugon ang kalibutan pag-usab, ug ang matarung (diha sa Milenyum) magalakaw sa ibabaw sa mga abo sa mga dautan. Husto ba kana? Kita n’yo?

Busa ania na kita mismo sa katapusang panahon. Ania na kita nagapahimutang karon sa maong pultahan, nagapaabot Kaniya nga moabot.

¹⁷³ Himatikdi, ang Dios nagsaad sa Iyang Pulong nga pilion Niya ang Iyang Pangasaw-onon pinaagi sa Iyang orihinal nga pamaagi. Iyang gipili ang Iya. Ang Pamanhonon! Iya nang gitagna kini pinaagi sa mga propeta, ug gipadala ang usa ka propeta aron sa pagpaila niini.

Ang maong propeta nag-ingon, nga nagatindog sa mga tampi sa Jordan, “Tan-awa!”

Sila miingon, “Ikaw mao ang Mesiyas, dili ba?”

Siya miingon, “Dili, dili ako ang Mesiyas.”

“Ikaw gayud mao ang Mesiyas.”

¹⁷⁴ “Apan ako dili mao Siya. Kondili nagatindog Siya sa inyong taliwala. Ug sa Iyang sandalyas, dili ako takus sa pagbadbad. Kung moabot na Siya, ipaila Niya ang Iyang Kaugalingon...”

Ug karon Siya nagatindog sa atong taliwala, diha sa personang Espiritu Santo, nagapadayag sa Iyang Kaugalingon sa dugang pa gayud, nagakunsad diha sa Iyang Iglesia, ginapaila ang Iyang Kaugalingon; tungod kay, Siya, ug ang Pangasaw-onon ug ang Pamanhonon mao ra, ginapadayag ang Iyang Kaugalingon. Ug sa usa ka adlaw imong makita nga ang maong Usa nga inyong gibati diha sa imong kasingkasing, ug nga makita ang Iyang ilhanan, mamahimong personal na sa imong atubangan, dayon ikaw ug Siya Usa ra.

Gihiusa ka pinaagi sa Pulong. Ug ang Pulong, mao’y sa sinugdan, mobalik ngadto sa sinugdan, nga mao ang Dios. “Ug nianang adlawa inyong masayran nga Ako anaa sa Amahan, ang Amahan ania Kanako; Ako anaa kaninyo, ug kamo ania Kanako.” Aleluya! Ania na kita dinhi. Aleluya! Malipayon ako

nga makita Siya nga nagapakalawas sa Iyang Kaugalingon sa ato mismong taliwala, ug makita kung unsay Iyang gisaad alang sa Pulong; dili sa kung unsay pagbati sa uban, sa panag-awit, ug panaglukso, ug panagsayaw. Kondili pinaagi sa Iyang Pulong, amen, ginabuhat Niyang dayag ang Iyang Kaugalingon.

¹⁷⁵ Tan-awa, sa dihang ilang gidala, gipatindog ang templo ug gidala ang arka sa sulod niini, ang Dios misulod didto pinaagi sa Haligi nga Kalayo. Amen. Si David kadto ang nagalukso-lukso ug nagasinggit, ang mga mag-aawit kadtong tanan ug ang mga pari nga nagpadayon, sa dihang nahigawas na sila sa kabubuton sa Dios. Apan sa dihang giila sa Dios ang arka diha sa Iyang maong dapit ug pwesto, sa dili pa nila mahimong isulod ang arka didto, ania karon ang Haligi nga Kalayo nagapanguna sa dalanon; didto mismo ibabaw sa mga pako sa mga querubin, ug diha mismo sa luyo sa maong Labing Balaan sa mga balaan, ang dapit nga Iyang pahulayanan; ang Haligi nga Kalayo! Ug ang himaya sa Dios atua didto, hangtud nga ang ka- . . .dili na gani nila makita kon unsa-on ang pagsilbi. Amen.

Magapalong Kini sa mga mata sa matag teologo, sa dihang moabot na Siya alang sa Iyang Pangasaw-onon. Pagalalinon Siya diha sa—diha sa tungang gabii, maingon sa kaniadto, ngadto kanila. Dili gani Siya nila makita nga nagabiya na. Oh, dalaygon ang Dios!

¹⁷⁶ Himatikdi, ang Dios nagsaad nga Iyang ipahigawas ang Iyang Pangasaw-onon, sa kon unsay Iyang pagabuhaton. Maanaay usa ka Binhi. Maanaay usa ka Kahayag sa panahon sa kagabhion, sa kon unsaon Niya sa pagbuhat niining tanang butang, sa tukma gayud, ug sa paagi nga Iyang gilaraw kini sa orihinal sa Daang Tugon ug sa Bag-ong Tugon.

Ug kini dili pinaagi sa denominasyon. Dili kini pinaagi sa sistema nga atong ginagamit karon. Kita lang ang nagakahimong hinungdan sa kamatayon. Ginatugotan ang tawo sa pagpanghilabot Niini, ug mangamatay tungod niini. Kita n'yo?

¹⁷⁷ Ang Pulong, ang Mensahe sa kagabhion, kinahanglan nagadala ug mga bunga sa kagabhi-on. Ang Mensahe sa kagabhion kinahanglan nga nagapugas ug Binhi sa kagabhi-on, dili binhi sa kabuntagon. Binhi sa kagabhion! Husto ba kana? Ang yugto sa kaudtohon, ang mga binhi niini kaniadto, mao'y denominasyon; namatay na kini, nawala na. Apan ang Mensahe sa panahon sa kagabhion magapakita ug Kahayag sa panahon sa kagabhion, magapakita ug mga bunga sa panahon sa kagabhion; ang maong Mensahe sa panahon sa kagabhion!

Sa panahon ni Jesus, ang kaudtohon nga mensahe, nagpakita'g mga pang-kaudtohong bunga. Ang mensahe sa sinugdan nagpakita sa mga pang-sinugdan nga bunga, gibuhat ang kabuhatan. Iyang gibuhat ang Iyang Anak diha sa Iyang

Kaugalingong dagway, diha sa kaudtohon. Sa panahon sa kagabhion Iyang ginabuhat ang usa ka Pangasaw-onon alang Niini. Kita n'yo? Sa unsang paagi? Sa Iyang Pulong.

Giunsa man Niya pagporma ang kalibutan? Giunsa man Niya ang pagsulti niini ngadto sa pagkalungtad? Pinaagi sa Iyang Pulong!

Kinsa man ang Iyang Anak? Ang Pulong! “Sa sinugdan mao na ang Pulong, ug ang Pulong kauban sa Dios. Ug ang Pulong nahimong unod ug mipuyo sa maong taliwala.”

Unsaon man Niya pagkuha sa Iyang Pangasaw-onon? Pinaagi'g Pulong; dili pinaagi sa usa ka bag-ong caro, dili pinaagi sa pangagpas sa teologo. Kondili sumala sa Iyang Pulong pagailhon Niya Siya. Ayaw'g pagdugang ug usa ka butang Niini o pagtaktak ug usa ka butang Niini karon. Pasagdi Kini sa ingon Niini. Kita n'yo?

¹⁷⁸ Sa panahon sa kagabhion, Iyang gisaad nga Iyang ipadayag, bisan pa, ang pag-abli niining Pito ka mga Timri ug ipakita kung unsay nasaylo-an sa mga kaiglesiahanan kaniadto. Sa Pinadayag 10, ug Malaquias 4, Lucas 17:30, Siya nag-ingon nga buhaton Niya kini. Karon dili nato kini pagsagulon. Atong ipabilin kini mismo nga ingon niana.

¹⁷⁹ Tugoti ako, alang sa pagtapos...Hapit na, mag kinse minutos na para mag-alas dose. Tugoti ako sa pagtapos, sa pag-ingon niini.

Mga higala, paminaw, sa Ngalan ni Ginoong Jesus! Kining mga butanga tataw gayud kaayo alang kaninyo nga dili pa toohan Kini. Tataw kaayo alang kaninyo nga dili pa makita Kini. Siguradong mahimo ninyong makita Kana! Sigurado ang kalibutan mahimong makita Kini! Apan lamang sa inyong. . .

Ayaw pagpagahum pinaagi niining mga bag-ong pandanggo ug mga butang nga aduna kanila karon; dili ko igsapayan kung unsa pa ka maayo silang tawo, unsa pa ka matinud-anon sila. “Kung wala sila nagasulti sumala sa kasugoan ug sa mga propeta,” ang Biblia nag-ingon, “walay Kinabuhi diha kanila.” Kita n'yo?

¹⁸⁰ Nagdahum si David nga husto siya. Matinud-anon siya. Kadtong mga pari naghunahuna nga husto sila. Mga matinud-anon sila. Apan napakyas lang sila sa pagkonsulta sa Ginoo mahitungod niini. Ug giunsa kaha nila sa pagbuhat niini? Tingali miingon sila, “Nanag-ampo na kami.” Apan dili kadto ang pamaagi sa Dios sa pagbuhat niini. Nagsaad Siya nga dili Siya mobuhat ug bisan unsa hangtud nga Iya una kining ipadayag sa Iyang mga alagad nga mga propeta. Ug didto anaa si Nathanael nagbarog sa ila mismong taliwala, ug wala man lang siya gikonsulta.

¹⁸¹ Karon basaha ang mosunod nga pipila ka mga kapitulo diha sa Mga Cronicas, ug inyong makita. Sa dihang nilingkod si David diha sa maong balay, ug miingon, “Husto ba kini,” ug si Nathanael nagalingkod uban kaniya, “nga kinahanglan ako, nagapuyo sa cedro, ug—ug ang arka sa Dios anhi sa ilalum sa balong-balong?” Ug hingkaplagan ni Nathanael, gikan sa Ginoo, kung unsay isulti kaniya aron buhaton.

¹⁸² Ug iyang nahimong nabuhat ang sayup, busa dayon nga ang Dios miingon, “Sultihi ang akong alagad nga si David nga gihigugma Ko siya. Gipasadunggan ko siya sama sa mga bantugang tawo sa yuta, apan dili Ko siya mahimong tugotan sa pagpabuhay niini,” kita n’yo, “Iya na akong gipakyas. Kita mo, dili ko siya mahimong tugotan sa pagbuhay niini. Magpatungha Ako ug usa ka tawo, ang iyang anak, maoy magpatindog sa maong malungtarong balay sa Dios.” Ug mao kadto si David, siempre. Nga, si Solomon maoy tipo niini, apan bisan pa napakyas siya. Ang matag tawo mapakyas gayud. Ang tanang tawo mapakyas gayud.

Ang Dios mao ray Bugtong nga dili mapakyas. Dili Siya mahimong mapakyas. Mao kanay usa ka butang nga dili mabuhay sa Dios, ang pagkapakyas. Ug ang Dios mao ang Pulong. Ug ang Pulong, bisan kon unsa pa kini kasusama tanawon nga mahiadto sa nianang laing paagi, mahiabot gayud kini sa tukma nga paagi nga giingon sa Pulong.

¹⁸³ Karon hinumdumi, kinahanglan nga sundon mo ang maong panahon, ang maong takna. Kita n’yo? Ug kon unsang panahona ka nahisakop karon, kon unsang taknaa, ug tamda kana nga napanghimatud-an, aron makita nga kini gayud ang Kamatuoran.

¹⁸⁴ Karon pamalandungi kining tanan nga mga gikinahanglanon, ang tanang Pulong, ang tanang pagtipo, ug ang maong mga butang, ug tan-awa kung asa ka napahimutang. Pamalandunga ang maong takna nga ania kita nagapuyo.

Lantaw sa unahan, nga hapit na sa ika-napulo ka bahin sa yuta pahiadto na sa pagkahugno. Siyensya ang nagaingon niana. Nanagtutok sila sa orasan. Sa milabay’ng pipila ka katuigan, nanag-ingon, “Tulo na lamang ka gutlo karon mag tungang gabii na.” Tingali’g usa na lang ka gutlo, tingali’g tunga na lang sa gutlo karon.

Miingon sila, “Dili kini mahitabo sa atong kaliwatan.”

¹⁸⁵ “Mahimong mahitabo kini sulod sa lima ka gutlo.” Ug himatikdi ang sunod butang nga iyang giingon, “Lima ka tuig.” Wala gayud ako mag-ingon niana karon. Siya maoy nag-ingon niana, ang maong siyentista. Nanagpanon na sila pahilayo sa California ingo’g mga langaw. Kita n’yo? Bueno, sa adlaw nga si Lot migawas na sa Sodoma, sa mao rang adlaw na miulan ug kalayo sa ibabaw sa yuta.

Usa sa niining mga adlaw pagakuhaon na sa Dios ang atong Mensahe, ug mobiya na kita dinhi. Adunay butang nga mahitabo, sigurado gayud, dayon, sa dihang wala na ang Iglesia, ang Iyang Lawas, ang Iyang Pangasaw-onon.

¹⁸⁶ Karon gusto kong basahon kaninyo ang usa ka Kasulatan, ug gusto ko nga basahon ninyo Kini uban kanako. Buot ko nga inyong ablihan sa Deuteronomio 4, alang sa pagtapos. Nagtoo ako nga igo na tingali kung unsa man ang napamulong na, nga masabtan ninyo. Deuteronomio 4. Basahon ko ang duha ka dapit dinhi.

Ug ngadto niining iglesia, ug nganha sa mga teyp, sa mga katawhang nag-teyp, ug mga katawhan nga nakakonekta diha tadlas sa ubang mga bahin sa nasud, gusto kong maminaw gayud kamo niini pag-ayo, ug ayaw ninyo'g pakyasa. Mao kini ang butang nga akong...

Deuteronomio, sa ika-4 nga kapitulo. Akong kuhaon ang ika-1 nga bersikulo. Gusto kong basahon ang ika-1 nga bersikulo, dayon akong basahon ang ika-25 ug ang ika-26 nga bersikulo. Mahimong basahon ninyo kining tanan paguli na ninyo; apan aron lang, sa pagdaginot sa oras, aron makapanggawas kita sa hustong takna, tungod kay mobalik pa ako karong gabii, kon itugot sa Ginoo. Paminawa kining propeta nga nagaingon. Gikan na siya sa Presensiya sa Dios. Nahibalo siya mahitungod sa kung unsa may iyang ginaingon. Paminaw.

Busa karon magpatalinghug, Oh, Israel, sa kabalaoran ug sa mga tulomanon, nga akong ginatudlo kaninyo, nga inyong pagabuhaton, aron mabuhi kamo, ug mosulud ug manag-iyu kamo sa yuta nga gihatag kaninyo sa GINOONG Dios sa inyong mga amahan. (Nagatipo kana sa atong Milenyum.)

Dili kamo magadugang sa pulong nga akong gisugo kaninyo, ni pagkunhoran ninyo kini, ("Ayaw pagdugangi Kini'g usa ka butang, ug ayaw pagtaktak ug usa ka butang gikan Niini. Pagpabilin, isulti lang kon unsay ginaingon Niini!") aron pagabantayan ninyo ang mga sugo sa GINOO nga inyong Dios nga akong gisugo kaninyo.

Ang inyong mga mata nakakita kung unsa ang gibuhay sa GINOO... ngadto kang Baal-peor: kay ang tanang mga tawo nga mingsunod kang Baal-peor, gilaglag sa GINOO nga inyong Dios gikan sa taliwala ninyo. ("Karon kamo maoy katawhan nga linain, gikan kanila nga mga denominasyon." Kita n'yo? Kita n'yo?)

Apan kamo nga mingpabilin sa GINOO nga inyong Dios, mga buhi kamong tanan niining adlaw. ("Wala gayud kamo namatay uban sa inyong denominasyon. Mga buhi kamo karon, ug ania sa Presensiya sa Dios.")

Sa pagtapos, ayaw'g pakyasa kini. Sa ika-25 nga bersikulo, karon, sa ila nang pagsulod sa maong yuta, karon bantayi kung unsay nahitabo.

Ug sa diha nga kamo maga-anak ug mga anak, ug mga apo, ug kamo...magdugay na sa yuta, ug mangadaut kamo sa inyong kaugalingon (mao kana ang nahitabo), ug magabuhat...linilok nga mga larawan (usa ka laing butang), kon dagway sa bisan unsang butang, ug magabuhat ug dautan sa mga mata sa GINOO nga inyong Dios, aron sa paghagit sa pagpasuko kaniya: (Paminaw!)

Tawgon ko ang mga langit ug ang yuta aron sa pagsaksi batok kaninyo niining adlaw, kita n'yo, nga sa madali mangamatay gayud kamo sa ibabaw sa yuta, o sa maong dapit, kon diin gitabok ninyo ang Jordan sa pagpanag-iya niini; dili kamo makapuyo niini ug hataas nga mga adlaw, kondili paga laglagon gayud kamo.

¹⁸⁷ Mao kadto si Moises nga nagapakigsulti sa Israel, human siyang gipanghimatud-an sa Dios, pinaagi sa Haligi nga Kalayo, ug nasayod nga siya mao ang gipamatud-an nga alagad sa Dios sa pagpahigawas kanila. Ug sa wala pa sila nahiadto sa maong yuta, sa wala pa sila misulod, si Moises miingon, “Karon, sa mga pulong nga akong gikaingon kaninyo, akong ginatawag ang langit ug yuta aron pagsaksi batok kaninyo. Kung inyong dugangan Kini ug usa ka butang, o motaktak ug usa ka Pulong gikan Niini, dili kamo makapabilin sa maong yuta nga ginahatag sa Ginoong Dios kaninyo.”

Mao pud nga akong ginasulti, sa Ngalan ni Jesus Cristo! Ayaw gayud pagdugang ug usa ka butang. Ayaw kuhai, magbutang sa inyong kaugalingong mga panghunahuna diha Niini. Isulti lamang ninyo kung unsay giingon diha sa maong mga teyp. Buhata ninyo ang mao ra gayud kung unsay gisugo sa Ginoong Dios nga buhaton. Ayaw pagdugang Niini.

¹⁸⁸ Iya nang sa tanang panahon, ginatuman ang Iyang saad kanato. Ang matag saad nga Iyang gihimo, gituman Niya kini. Nag-ingon ba Siya kaninyo kon unsay mahitabo, ug nahitabo ba kini? Ginadala ko ang mga langit ug yuta sa inyong atubangan karon, sa usa ka hagit. Aduna ba gayud giingon ang Dios ug bisan unsang butang nga wala Niya gituman ug gibuhat sa tukma kon unsay Iyang giingon nga Iyang pagabuhaton alang kanato? Wala ba kini Niya nabuhat ingon sa paagi gayud nga Iyang giingon nga Iyang buhaton kini? Mao kanay tukma. Mao nga Iya gayud padayonon ang pagbuhat niini. Ayaw lang pagdugang Niini. Ayaw Kini pagkuhai. Tohoi lamang Kini ug paglakaw nga mapaubsanon sa atubangan sa Ginoong nga imong Dios, tungod kay kita nagakahiduol na sa pagsulod sa maong Yuta.

Dayon, dili na kamo mangbalik, dili na kamo mangbalik niining matanga sa kinabuhi pag-usab. Mangbalik kamo ingon nga usa na ka binuhat nga walay kamatayon. Magabalik kamo, sa dihang igahikling na ang kasal-anan, sa dihang nagapus na si Satanas, ug sulod sa usa ka libo ka tuig mangpuyo kamo dinhi ibabaw sa yuta nga gikahatag kaninyo sa Ginoo nga inyong Dios. “Tungod kay ang maaghop makapanunod sa yuta.” “Bulahan siya nga nagabuhat sa tanan Niyang mga sugo, kay makabaton Siya ug katungod sa pagsulod sa maong Siyudad.” “Kay sa gawas anaa ang mga barangan, mga bakakon, mga makihilawason, ug mga iro. Dili sila makasulod dinhi niini.” Kondili alang lamang sila sa mga Tinubos, ug kanila nga nagalakaw sa Iyang kasugoan.

¹⁸⁹ Ayaw dawata ang pipila ka bag-ong butang. Mikaylap na sila sa tanang dapit, ug aduna pay daghan niana nga moabot. Apan ayaw pagdawat niining mga bag-ong butang.

Gipahayag na sa Ginoo nga inyong Dios kung unsay Kamatuoran. Ang Ginoo nga inyong Dios gipanghimatud-an na kung unsay Kamatuoran, pinaagi sa Iyang Pulong ug pinaagi sa Iyang Espiritu. “Dili pinaagi sa gahum, dili pinaagi sa kusog, kondili pinaagi sa Akong Espiritu.” Ug, ang Espiritu, “Ang Dios nagapangita kanila nga nagasimba Kaniya diha sa Espiritu ug Kamatuoran.” “Ang Imong Pulong mao ang Kamatuoran.” Ug gipanghimatud-an gayud Niya pag-ayo nga si Jesus Cristo mao sa gihapon kagapon, karon, ug hangtud sa kahangturan. Iya nang napakita ang mga Binhi sa kagabhion diha kaninyo. Iya nang gipadayag Kini kaninyo, diha sa Pulong. Gipamatud-an na Niya Kini kaninyo, pinaagi sa Iyang Espiritu.

¹⁹⁰ Ayaw gayud pagsugod ni sulayan ang organisasyon. Ayaw gayud sulayi ang pagtukod ibabaw diha sa bisan unsa pa.

Kondili magpabilin nga mapainubsanon sa atubangan sa Ginoo nga imong Dios, tungod kay morag haduol na magaabli ang mga pultahan ngadto sa maong gisaad nga Yuta. Unya mangsulod kita uban sa matuod nga panag-awit ug panagkalipay, sa dihang ang Pangasaw-onon ug ang Pamanhonon nagapahimutang na sa Trono.

¹⁹¹ Pagkinabuhi nga mapaubsanon. Pagkinabuhi nga mahigugmaon. Maghigugmaay sa usa’g usa. Ayaw gayud pagbaton ug walay hinungdan tali kaninyo. Kung nakita ninyong adunay butang sa inyong kasingkasing batok kang bisan kinsa, tangtanga kini mismo diha dayon. Ayaw pag. . .

Ug buhaton ni Satanas ang kutob sa iyang mahimo aron magpataliwala diha kaninyo. Kita n’yo? Ayaw gayud ninyong itugot nga mahitabo kana. May mga tawong hanas manulti tingali’g mouban-uban ug tinguhaan kang sakmiton pahilayo gikan Niini. Nagadahum ka ba nga mahaylo nila sa panulti si Moises pagpahigawas sa Presensiya sa Dios, diin nakatindog

na siya didto ug nakita na Kini? Dili, sir. Dili. Dili Kini nato ginakuhaan o ginadugangan Kini. Pasagdi Kini sa paagi nga gisulti sa Ginoo. Dili nato gusto ang denominasyon. Dili nato gusto ang mga organisasyon. Dili nato gusto ang kasilag. Dili nato gusto ang panagkabingkil. Ang Dios maoy atong gusto, ug Siya mao ang Pulong.

Karon atong iduko ang atong ulo.

¹⁹² O Dios, nagalantaw ako sa palibot uban sa espirituhanong mata, ginapaninguhaan ko ang pagtan-aw kung unsa nay nagakahitabo. Akong makita ang Imong Pulong, sa paagi nga Kini gipanghimatud-an, sa paagi nga Kini gipamatud-an na; sukad pa niadtong milabay nga katloan ka tuig, dinhi sa maong suba, sa kung unsa ang Imong giingon. Ug ania kini karon, human na sa katlo-an ka tuig, ug Imong ginabuhat lamang ang sumala sa Imong giingon. Ug Imong gibuhat kung unsa lang gayud ang Imong giingon. Ginoo, ipahilayo unta kini gikan kanamo ang pagsulay sa bisan unsang pagpahigamay pa Niini o sulayan ang pagpahidako pa Niini; pasagdan lang Kini sa kahimtang nga Imong gibuhat Kini, magalakaw lang nga mapainubsanon ug nga nagasunod Kanimo.

¹⁹³ Mao kini sila, Ginoo, nga Imong gikahatag ngadto sa bulohaton, gawas niadtong tanan nga nangatulog na latas sa nasud, sa tibuok kalibutan. Ang mga lubnganan dinhi nagakupot sa kadaghanan kanila nga nagapaabot, ang bulahang mga balaan. Apan kini mao ang kung unsay giingon, “Kita nga mga buhi ug nagapabilin pa dili magauna kanila nga mga nangamatay na. Ang trumpeta motingog, ang mga nangamatay mouna sa pagpamangon; dayon kita pagasakgawon uban kanila.” Sa dihang nagakunsad na ang himaya sa Dios ibabaw sa yuta, pagatagooon niini ang Iglesia pahilayo gikan sa kalibutan. Dili man gani kini makakita Niini sa dihang mobiya na Kini.

¹⁹⁴ Amahan nga Dios, ampingi kini sa Imong mga kamot. Imo sila. Nagaampo ako, Dios, nga sa kanunay magalakaw kaming mapaubsanon sa Imong atubangan. Wala kami makahibalo kung unsa ang kadugayon. Wala namo ginatinguhaan hibaloon kung unsa ang kadugayon; dili kini among bulohaton. Imo kanang bulohaton. Dili among mga pagbuot ang pagkasayod kung kanus-a Ka moabot. Ang among pagbuot, Ginoo, mao ang pagpabiling mapaubsanon hangtud nga moabot Ka, ug magalakaw nga uban Kanimo. Ang among tinguha mao nga mapaila lang Nimo ang Imong Kaugalingon, usahay, Amahan, sa among taliwala, aron among makita nga nagapakiglakaw pa kami gihapon uban Kanimo.

¹⁹⁵ Pasayloa kami sa mga kanhi namong mga kasal-anan. Giyahi kami ug panalipdi kami gikan sa tanang lit-ag sa yawa, alang sa umalabot. Agaka kami ug giyahi kami, O Dios nga among Amahan. Pasayloa ang among mga sala ug tabangi kami

nga mahimong Imong mga anak. Mga kabus kami nga matang sa katawhan. Mga sinalikway kami, sa mga katilingban niining kalibutana, sa mga denominasyon sa kaiglesiahanan.

Amo nang makita ang katapusan. Ug ginapasalamatan Ka namo tungod sa maong espirituhanong panan-aw sa Imong Pulong, aron makita ang katapusang panahon, tungod kay kining mga butanga kinahanglang moabot gayud ngadto sa dakung pagbato nga gikan sa Langit. Tabangi kami, Ginoo, nga mamahimong wala dinhi nianang adlaw, kondili nahidangat na ngadto sa Imong Presensiya, manglupad paingon ngadto sa Imong sabakan.

¹⁹⁶ Ayoha ang masakiton ug ang nag-antus, Ginoo. Nagapangamuyo kami nga unyang gabi Imong ihatag kanamo ang maong usa ka dakung bulohaton, mahinaut nga wala nay tawong maluyahon sa among taliwala, tungod sa Imong Presensiya, Ginoo. Hinaut nga ang among mga kasingkasing kanunay'ng mapahimutang diha Kanimo. Ug nahibalo kami, Ginoo, nga ang salapi, kabtangan, ang mga butang sa kalibutan walay mga kapuslanan, mga lumalabay lamang. Silang tanan mangahanaw gayud. Ang among mga trabaho, ang among mga pwesto, ang among mga kahigalaan, ang tanan gayud mangahanaw. Bisan kung unsa pa ka bahandianon, unsa man ka kabus, unsang pagkainila, o pagka-dili inila namo, kining tanan gayud mangahanaw. Apan aduna lamang usa ka butang nga ang among pagkinabuhi dinhi nasentro, ug kana mao si Jesus Cristo. Busa, Dios, tugoting ipadaplin namo ang tanang butang ingon nga ikaduha lamang, ug nga mogunit Kaniya. Ug Siya mao ang Pulong. Itugot kini, Ginoo.

¹⁹⁷ Ang gipanghimatud-ang Pulong sa maong panahon! Ang gipanghimatud-ang Pulong sa mga adlaw ni Moises mao si Jesus. Ang gipanghimatud-ang Pulong sa adlaw ni Isaias, ni Elias, ni Juan, tanan na, mao si Jesus. Ug ang gipanghimatud-ang Pulong sa karong adlaw mao si Jesus, ang mao sa gihapon kagahapon, karon, ug hangtud sa kahangturan. Tabangi kami, Ginoo, nga toohan kana, nga makita kana, ug magalakaw diha niini. Amo—among ginapangayo sa Ngalan ni Jesus.

¹⁹⁸ Uban sa pagduko sa atong mga ulo, wala ako makasiguro kung aduna bay ania dinhi nga wala pa gayud sa pagkatinuod nakahimo nianang usa ka dakung, igo na gayung . . . Ginatoohan mo Kini, apan dili pa igo ang pagtoo lang Niini.

Nagatoo ako nga ang akong asawa usa ka maayong babaye. Nailhan ko ang iyang amahan, ang iyang inahan. Nailhan ko siya sa mga katuigan ug katuigan. Naglakaw siya sa usa ka matarung nga pagkinabuhi. Nagtoo ako nga siya usa ka maayong babaye, apan wala kana nagapaangkon kanako kaniya. Wala gayud siya nahimong ako' hangtud, siya, ako siyang gidawat, gidawat niya ako.

Karon gusto ni Jesus nga dawaton ka. Dili mo ba Siya dawaton ug mahimong kabahin sa Iyang Pulong? Kung wala pa nimo kana nabuhat, uban sa pagduko sa imong ulo ug sa pagduko sa imong kasingkasing, nagasalig ako . . .

¹⁹⁹ Wala nay luna alang sa pagpaduol pa diri sa altar. Dili na man ako kaayo niana, bisan pa man. Nagatoo ako nga ang Dios nagaduaw kaninyo diha mismo kung asa man kamo. Mahimo bang iisa ninyo ang inyong mga kamot, moingon, “Igsoong Branham, hinumduma ako sa pag-ampo. Buot kong buhaton kana.” Ang Dios magapanalangin kanimo. “Akong . . .” Ang Dios magapanalangin kanimo. Aba, daghan nang kamot bisan asa! “Buot kong mahimong ingon niana.” Ang Dios magapanalangin kanimo, igsoon. Panalanginan ka, igsoon; kamong tanan, sa palibot. “Gusto kong maingon niana.” Ang Dios magapanalangin . . . “Sa tinud-anay buot kong maingon niana. Akong—Ako nang nakita kini.”

Bueno, karon, tan-awa, higala, tingali’g adunay gamay’ng butang . . . Kung dili ka ingon niana, nan adunay butang nga nasentro ka gawas niana. Haduol ka na kaayo niini, nga nakatutok ka na diha niini. Nakita mo kini. Nakita mo na kini sa mga katuigan, nga nagakahiduol na. Nakita mo kini nga nagkahamtong na karon. Kung kana nagakahulogan ingon nga tanan na alang kanato, ug wala nay lain pang magmalungtaron kondili Kana, nganong dili mo man lang ilingiw ang imong ulo gikan nianang butanga nga imong sukad pa ginatutokan ug isentro ang imong kaugalingon Kaniya? Kinsa, ang sentro sa tanang kinabuhi, tanan human dinhi, mao Siya. Dili mo ba kini buhaton, samtang managduyog kita sa pag-ampo?

²⁰⁰ Minahal nga Dios, samtang nga ang mga kamot sa kalalaken-an, mga kababayan-an, mga batang lalaki, mga batang babaye, bisan pa ang mga ministro, nanag-isa sa ilang mga kamot. Sila—sila gustong mo-moingon nga gusto silang mahimong masentro mismo kang Ginoong Jesus, ug bisan pa niana morag dili kini nila mahimo. Adunay butang nga nagabira kanila *niining* direksyon, *nianang* direksyon. Usa kini tingali ka denominasyon, usa kini tingali ka tawo, tingali’g usa kini ka sala, tingali’g butang kini nga ilang ginatago sa ilang kasingkasing. Wala ako mahibalo, Ginoo. Nasayod Ka. Kung unsa man kini, hinaut lang nga karon, Ginoo, samtang nga diha sa uban Ikaw nagatawag . . . Human na Nimo silang gitawag. Imo sila.

Ug samtang nga ginatawag Mo sila, hinaut nga ilang buhian kana, kanang nagalikos nga sala, sama sa giingon sa Biblia. “Iwakli kanang sala nga nagapiit paglikos kanato, aron nga mahimo natong dalaganon nga malahutayon ang lumba nga atong ginaapilan, nga nagatutok ngadto . . .” Sa unsa, sa among trabaho, sa among denominasyon, sa among ginapasakopan, sa maong mga konseho? “Ngadto kang Cristo nga mao ang Mag-uugmad ug Maghihingpit sa pagtoo nga ania kanato diha

Kaniya.” Buhata kana, Amahan, alang kanamo karon, tungod kay among ginapangayo kini sa Iyang Ngalan ug alang sa Iyang kahimayaan.

²⁰¹ Karon Imo na sila, Ginoo. Buhata kanila sumala sa Imong makita nga angayan. Buhata kanamo sumala sa Imong makita nga angayan. Kami mga Imo man. Sa Ngalan ni Jesus. Amen.

I love Him, I love Him
Because He first loved me
And purchased my salvation
On Calvary's tree.

²⁰² Nalimot na ba kamo sa paniudto? Inyo bang nahikalimtan kung ang mga bata maayo ra ba, didto sa sakyanan, o dili ba? Inyo bang nahikalimtan na ang mahitungod sa mga kagahapon, ug naila kung unsa na ba kanang imong ginabati karon? Nagkaanam na kini nagakatuman diha kanimo, sa matag adlaw. Kita n'yo? Himoa kana nga mao ang sentro sa bisan unsa. Pasagdi nga mangawala na ang uban pang butang; mangahanaw ra sila, sa gihapon.

Oh, pagpadayon lamang sa pagsunod Kaniya! Kita n'yo? Maingon nga si Eliseo misunod kang Elias, sundon nato Siya. Tungod kay kita pagalalinon, usab, sa usa ka adlaw. Atong nakita ang karwahe nga Kalayo nga mibayaw Kaniya gikan sa lubnganan. Atong ginabati Kini karon sa atong taliwala. Sa umaabot nga adlaw Iya nang pagabuhian ang mga kabayo gikan sa kakayohan. Lalinon kita ngadto sa kahitas-an. Dili ba ninyo Siya ginahigugma?

And purchased my salvation
On Calvary's tree.

Oh, dili ba lamang ninyo mahimong piyongon ang inyong mga mata ug tan-awon Siya nga nagabitay kaniadto?

I love Him, (kinsa pay akong mahimong
higugmaon?) I love Him
Because He first loved me
And purchased my salvation
On Calvary's tree.

²⁰³ Sa matag higayon nga nagapauli ako, adunay namatay. Mawala lang ako ug pipila ka bulan, pagbalik, adunay nawala. Nagakaguol ako sa matag higayon nga nagaabot ako.

Sa miaging adlaw, may usa ka lalaki nga akong kaniadto nakauban sa tulunggaan, nagalakaw diha sa dalan, matud niya, “Hello, Billy.”

²⁰⁴ Gitan-aw ko siya, ambungan siya kanhi nga tawo, itum kaayo ang buhok nga sinaw ug maayong pagkasudlay; karon puti na kini sama sa niebe. Tul-id kaayo siya kaniadto; ang tiyan nagbusyad na sama *niini*. Matud ko, “Hello, Jim.” Ako siyang gitan-aw.

Gibati ko sa akong kasingkasing, nakahunahuna ako, “Dios, kanang tawhana ug ako, kanang maong lalaki ug ako, magkaedad ra.”

Dayon, nasayran ko nga ang akong mga adlaw maihap na lang. Nasayod ako nga dili na kini kaayo magdugay. Mitan-aw ako sa palibot, ug namalandong, “Unsay akong mahimong buhaton, Ginoo? Tabangi ako. Dili ko buot nga mag-una Kanimo. Gusto ko nga magpabilin mismo diha—diha sa Imong luyo. Ikaw maoy manguna sa dalan.” Mitan-aw ako, ug namalandong, “Kalim-ag unom na ka tuig ang kaguwangon, oh, sus, dili na gayud magdugay!”

²⁰⁵ Ug sa mitan-aw ako sa ubos, nakita ko ang akong maayong higala nga si Bill Dauch nagalingkod didto, kapitoa’g duha o kapitoa’g tulo ka tuig ang kaguwangon. Mitan-aw ako sa palibot, akong nakita kining mga bata, nagahunahuna sila, “Ah, hulaton ko hangtud nga matiguwang ako sama ni Igsoong Branham, hunahunaon ko na kana.” Minahal, dili mo na gayud tingali makita kana. Duda gyud ako kanimo nga makita pa kini. Kita n’yo? Apan, hunahunaa lang, kung si Igsoong Bill Dauch buhi pa hangtud niining adlawa, lagpasan pa niya sa pagkabuhi ang ginatus sa mga nagakaedad sa napulog lima’g-, napulog unom ka tuig ang kaguwangon nga mga tawo. Nagakamatay sila matag takna.

Busa unsa may kalainan nga mahimo niini kung pila may imong edad karon! Unsa may imong ginabuhat mahitungod sa maong takna nga imong ginakabuhian? Unsa may imong ginabuhat alang kang Jesus niining panahona? Kita n’yo? Oh, buot ko Siyang makita. Buot kong motan-aw sa panahon nga akong ginapaabot ug makita kining mga tiguwang na nga mga lawas nga nangausab, makita silang “nangausab sa kalit lang, sa usa ka pagpamilok.” Kung dili man mao kana, nan kita maoy labing buangbuang na nga tawo; mokaon, moinum, ug magsadya, kay ugma mangamatay na man kamo; kita n’yo, sama ka lang sa mananap, mamatay ka ug moadto sa abog ug mao lang kana. Apan adunay usa ka mortal. . .immortal nga kalag nga nagapuyo sulod kanimo, igsoon. Ato nang nadungog gikan sa Langit. Ato nang nakita kini nga gipamatud-an. Nasayod kita nga Siya mao karon, ug tighatag sa balus niadtong mga nagapangita gayud Kaniya.

Karon, mga kabahin sa Lawas ni Cristo, samtang atong awiton kana pag-usab, buot ko nga molingkod lang kamo sa inyong mga lingkuranan ug maglamanohay samtang awiton nato kana pag-usab.

I . . . (itimbaya lang ang imong igsoong lalaki,
igsoong babaye) I love Him
Because . . . (Richard!) . . . me

And purchased my salvation
On Calvary's tree.

²⁰⁶ Ginahigugma ba ninyo Siya? Moingon, "Amen," [Ang kongregasyon nagaingon, "Amen."—Ed.] Inyo bang ginahigugma ang Iyang Pulong? Moingon, "Amen." ["Amen!"] Inyo bang ginahigugma ang Iyang kalihokan? Moingon, "Amen." ["Amen!"] Inyo bang ginahigugma ang Iyang Lawas? Moingon, "Amen!" ["Amen."] Nan, ginahigugma ninyo ang usa'g usa. Amen! Husto kana. "Niini ang tanang katawhan makaila nga kamo Akong mga tinun-an, kon kamo adunay paghigugmaay sa usa'g usa."

Karon ako nang gipandong ang akong mga kamot sa ibabaw niining mga panyo, kon inyo nang kinahanglan kuhaon sila sa dili pa magabii.

²⁰⁷ Buot kong si Igsoong Richard Blair... Gitubag sa Dios ang iyang pag-ampo, siya ug ang igsoon dinhi, nagaampo niadtong miaging adlaw, nga mabuhi kining gamay'ng bata nga lalaki nga kauban na kanato karon nga nagalingkod, nga buhi na, tungod sa ilang pagtoo sa Dios. Karon ihatag ko na kaniya alang ngadto sa pagpapauli kanato pinaagi sa pulong sa pag-ampo, sa makadiyut na lang, aron nga makabalik kita pag-usab unyang gabii.

Mga singko minutos na human sa alas dose, sa nianang relo. Ug buot ko nga mobalik kamo unyang gabii, kon inyong mahimo, kung ania ra kamo. Kung inyong kinahanglan mopauli, hinaut nga panalanginan kamo sa Dios sa inyong dalan, ug tabangan kamo, ug panalipdan kamo. Kung makapabilin kamo, ug buot nga magpabilin, giabiabi kamo sa pagpabilin. Ang Dios magauban kaninyo karon.


Till we meet! till we meet!

Till... (atong ibayaw ang atong mga kamot
ngadto Kaniya)... meet at Jesus' feet;

Till we meet! till we meet!

God be with you till we meet again.

[Nagasugod sa pag-hum si Igsoong Branham sa *God Be With You*—Ed.] Ingon niana ang pagbiya sa balay sa Dios, nga mainampoon, mapaubsanon, masaligon nga magkita kita pag-usab unyang gabii. Kung dili man, "Ang Dios magauban kaninyo hangtud nga magkita kita pag-usab!"

Ato nang iduko ang atong mga ulo karon. Igsoong Blair. 

NAGASULAY SA PAGBUHAT UG BULOHATON SA DIOS
NGA WALA SA KABUBUT-ON SA DIOS CEB65-0718M
(Trying To Do God A Service Without Being The Will Of God)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Hulyo 18, 1965, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2010 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org